

福州府志卷之四十九

人物一 列傳 閩縣

曩黃仲昭輯閩志惓惓人物而怪福郡舊志俱缺登載爰采郡人林謹夫先賢傳及蘭溪鄭瓘郡乘而摭摭之於哉爍乎此與天壤不敝者也夫福郡人物盛於趙宋洛閩大儒嫡派咸萃厥壤共肩聖道由元暨明克緒其業斯文統系繇繇延延遂集東南我

朝雲漢昭回視厥前修批周扶隋矣因首編列傳史例也次道學宋史例也次儒林翼經也次文苑能以理勝

福州府志

卷四十九 人物列傳

一

也或忠義或孝義守大節也或隱逸獨善其身也或藝術一曲之士也循序而布列之不敢濫亦不敢漏志人物

唐

侯固字子重閩縣人太和九年及第操履仁厚雖談笑亦有規準官至鄜坊靈武易定節度使同平章事兄子嶽

字公祝大中十二年進士未仕終 正德府志

林勗字公懋閩縣人大中五年進士以開元禮登科為吉

州刺史 勗著聞於民無所取惟飲吉水而已

福建通志



五代

謝瞳字子明閩縣人累舉不第依朱全忠署右職仕唐

通陵州刺史有政聲遷亳州團練使宣義節度觀察留

後閩書

宋

張錫閩縣人梁末劉君鐸任棣州刺史辟爲軍事判官棣
爲鄆之屬郡郡有麴務鄆以牙將王之頗橫恣民有犯
麴三觔牙將欲寘於死君鐸力不能救旣而牙將盜麥
百斛私造麴事覺錫判曰麴犯三觔求生不克麥盜百

福州府志

卷四十九

人物列傳

二

斛免死誠難時郡吏以使府牙將乞免錫不允固寘於

法同光末趙在禮舉兵於鄴瀕河諸州多稱亂錫權知

州事卽出省錢賞軍皆大悅一郡獨全棣人賴之後爲

淄川令不畏強禦專務愛民召爲監察御史出爲陝虢

觀察判官晉開運二年拜右補闕歷起居郎刑部員外

郎開封府判官浚儀令司門駕部二郎中並以清節聞

周顯德中以老疾求解官授右諫議大夫致政宋初改

給事中錫無子宰相范質嘗兄事之館於別墅錫以執

政之門不欲久處依鄉人鄧州觀察判官黃保緒建隆

二年卒

宋史

謝德權字士衡福州人父文節初仕王氏爲候官令後入南唐爲饒州團練使以驍勇聞吳人號爲鐵龍後守鄂州拒宋師戰沒德權歸宋補殿前承旨遷殿直陝西巡以勞就改右侍禁感陽浮橋壞命德權規畫築土實岸聚石爲倉用河中鐵牛之制纜以竹索由是無患咸平二年宜州溪蠻叛命陳堯叟往經度之德權預其行以單騎入蠻境衆咸聽命加闔門祇候廣韶英雄連賀六州都巡檢使代歸提點京城倉草場京城衢巷狹隘

福州府志

卷四十九

人物列傳

三

命德權廣之旣受詔則先撤貴要邸舍羣議紛然有詔止之德權面請曰臣已受命不可中止今沮事者皆權豪輦吝屋室僦資耳上從之會有兇人劉晏僧澄雅訟執政與許州民陰構西夏爲叛者詔溫仲舒謝泌鞫問令德權監之按驗無狀泌曰追攝大臣獄乃具德權曰使大臣無罪受辱則人君何以使臣臣下何以事君上可之六年命城新樂縣遷供奉官又命浚北平砦濠葺蒲陰城遽乘傳詣闕言今歲契丹必寇內地願速分戍鎮定高陽三路天雄城壘濶遠請急詔蹙之仍葺澶州

城北治德清軍城塹以爲豫備臣慮蒲陰工作未訖
必暴至上慰遣之既而契丹果圍蒲陰及聞有詔脩河
北行宮德權又驛奏請車駕毋渡河及至澶州德權單
馬閒道赴行在未幾遷內殿崇班提轄三司衙司德權
爲設條制均其差使有大將隸內侍主藏內侍爲奏留
規免煩重之役德權攜奏白上極言僥倖上稱其有守
又命提總京城四排岸領護汴河兼督輦運前是歲役
浚河夫三十萬而王者因循隄防不固河流汎濫卽中
流復淤德權以沙盡至土爲垠遣三班使者分地主役

爲大錐以試築隄之虛實或引錐可入者卽坐所轄官
吏植樹數十萬以固岸建議廢京師鑄錢監徙西窰務
於河陰改崇儀副使兼領東西入作司先時每營造患
工少至終歲不成德權按其役皆尅日而就大中祥符
元年議東封命與劉承珪戚綸同計度預修玉清昭應
宮劉承珪議掘地及丈加築以壯基址德權患其勞役
日與忿爭不能奪遂求罷復領京城倉草場導金水河

自皇城西環太廟凡十餘里三年出知泗州卒年五十
八權清苦幹事好興功利多所經畫見官吏徇私者

必面斥之所至整肅然喜采察纖微以聞於上朝論

之宋史

連光裕閩縣人太宗朝知應山縣有功於民後歷磁鄧二州推官其卒也應山人思其惠政迎柩葬於其縣子正因家焉正子舜賓舜賓子庶庠皆舉進士舜賓處士有行誼歐陽文忠爲作墓表

閩書

林揆閩縣人國子博士知南康軍有遺愛兄子殆庶字希顏父辨職方員外郎殆庶舉淳化三年進士累官度支員外郎秘閣校理知明州復知興化淳懿孝友士大夫

福州府志

卷四十九 人物列傳

五

多重之弟四人太素相州節度推官太微殿中丞太易永嘉丞太蒙興化丞

閩書

劉若虛字叔揚其先泉人徙居閩父甫仕吳越鄉間稱廉孝若虛舉咸平五年進士歷大理評事知永嘉縣遷寺丞知溫泉縣通判保定軍再遷太常博士通判洪州改尚書屯田員外郎知邵武軍卒若虛嚴明有大畧通五經大要摘其旨以爲脩身治官之用丁謂聞其名欲見之辭不往事親有疾不飲酒食肉居親側雖大暑中夕必嚴衣冠蒞官善決疑臨劇初若不更意及施下皆當

理守法不貸而民不敢忘于奕异姪彝孫康夫

參閩書
正德府

奕字蒙伯天聖八年進士歷知榮陽縣韓琦爲經畧使
辟奕鳳翔府判官事多倚辦集時連年兵敗民窮奕上
書朝廷言兵所以敗民所以窮之狀格不報歷通判漳
州潤州漳浦縣有虔州民四百餘人入縣買官所賣鹽
令捕之民因鬪拒令遂鞠其私販窮治之法應死奕爲
察其非私販而出其不鬪拒者坐法數十人而已卒於
潤州囊無餘貲民集錢二百千以賻奕妻辭卻之奕於

福州府志

卷四十九 人物列傳

六

文章以道理爲的其論性情推明孔子之法力教於人
從之學者咸以道自處

閩書

异字成伯隱居不仕鄉人號曰隱君後以州郡薦強起
授將仕郎大理評事歷屯田員外郎

閩書

彝字執中幼介特居鄉以行義稱從胡瑗學瑗稱其善
治水凡所立綱紀規式彝力居多慶歷六年進士爲邵
武尉調高郵簿移朐山令治簿書恤孤寡作陂池教種
藝平賦役抑姦猾邑人紀其事曰治範熙寧初爲制
置三司條例官屬以言新法非便罷神宗擇水官以彝

悉東南水利除都水丞久雨汴漲議開長城口彝請但
啓楊橋斗門水卽退爲兩浙轉運判官知處州俗尙巫
鬼不事醫藥彝著正俗方以訓斥淫巫三千七百家使
以醫易業俗遂變加直史館知桂州禁與交人互市交
趾陷欽廉邕三州坐貶除名元祐初復以都水丞召還
病卒於道著七經中義百七十卷明善集三十卷居陽

集三十卷

宋史

康夫字公南幼聰敏從周希孟學鄉人師其孝弟仁愛
主鄉校者三十餘載熙寧中廣東人乞詣主番禺學朝

福州府志

卷四十九 人物列傳

七

廷下其事索所爲文進志述二十七卷竟以未任不合
格止晚主泉州學規矩恪端泉人錄其教授之功以傳
諸人元祐中以特奏名舉未倡名前二日卒鄭俠表其
墓謂康夫事親事長恤窮撫穉成就才哲發於誠心爲
文若不由思慮而羽翼詩書根柢仁義雖素構無以過
之著有經訓雜文古律詩行於世

參閩書正
德府志

孫奕字景山閩縣人皇祐元年進士歷知南陵海陵二邑
呂誨知開封薦知封邱誨爲御史中丞又薦爲監察御
史論新法不便爲鄧綰所劾出監陳州酒稅陳襄知杭

州辟僉判襄在經筵復言奕事行著於鄉間節義信於朋友歷官所至以善政聞可謂循吏宜使當一路以厚俗安民元祐初除福建轉運使

福建通志

許將字冲元閩縣人嘉祐八年舉進士第一歐陽脩讀其賦謂曰君辭氣似沂公未可量也簽書昭慶軍判官代還當試館職辭曰起家爲官本代耕爾願以守選餘日讀所未見書宰相善其志以通判明州神宗召對除集賢校理同知禮院編修中書條例自太常丞當轉博士超改右正言明日直舍人院又明日判流內銓皆神宗

福州府志

卷四十九 人物列傳

八

特命舉朝榮之進知制誥契丹以兵二十萬壓代州境遣使請代地歲聘之使不敢行以命將將入對曰臣備位待從朝廷大議不容不知萬一北人言及代州事不有以折之則傷國體遂命將詣樞密院閱文書及至北境居人跨屋棟聚觀曰看南朝狀元及肄射將先破的契丹使蕭禧館客禧果以代州爲問將隨問隨答禧又曰界渠未定顧和好體重吾且往大國分畫矣將曰此事申飭邊臣豈不可何以使爲禧慙不能對歸報神宗善之以將知審官西院直學士院判尚書兵部進翰林

學士權知開封府爲同進所忌會治太學虞蕃訟釋諸生無罪者蔡確舒亶因陷之逮其父子入御史府踰月得解黜知蘄州明年以龍圖閣待制起知秦州改揚州又改鄆州上元張燈吏籍爲盜者繫獄將曰是絕其自新之路也悉縱遣之自是民無一人犯法三國皆空父老歎曰自王沂公後五十六年始再見獄空耳召爲兵部侍郎及西方用兵神宗遣近侍問兵馬之數將立具上之明日訪樞臣不能對也以龍圖閣直學士知成都府元祐二年再爲翰林院學士四年拜尙書右丞將自

福州府志

卷四十九 人物列傳

九

以在先朝爲侍從每討熙豐舊章以聞中旨用王文郁姚兕領軍執政復議用張利一張守約將始與執政復密疏利一不可用言者論其窺伺主意罷爲資政殿學士知定州移揚州又移大名府紹聖初入爲吏部尙書上疏乞依元豐詔定北郊夏至親祀拜尙書左丞中書侍郎章惇爲相與蔡卞同肆羅織貶謫元祐諸臣奏發司馬光墓哲宗以問將對曰發人之墓非盛德事方黨禍作或舉漢唐誅戮故事帝復問將對曰二代固有之但祖宗以來未之有本朝治道所以遠過漢唐者以未

嘗輒戮大臣也哲宗皆納之崇寧元年進門下侍郎累
官金紫光祿大夫撫定鄴鄆州邊臣欲舉師渡河朝議
難之將獨謂外國不可以爽信而兵機有不可失既已
戒具願遂從之未幾捷書至將以復河湟功轉特進凡
居政地十年御史中丞朱諤取將舊謝表析文句以爲
謗遂以資政殿大學士知河南府言者不已降資政殿
學士知潁昌府移大名加觀文殿學士奉國軍節度使
在大名六年數告老召爲祐神觀使政和初卒年七十
五贈開府儀同三司謚曰文定子份宋史

福州府志

卷四十九

人物列傳

十

份字子文崇寧二年登甲科累官國史編修政和中簡
功臣子牧郡份知鄧州政尚寬平在州四年囹圄幾空
改蔡州奉詔賑饑置場列室具器用鳴鼓給食三日一
往問饑飽察羸疾凡十月所活二萬六千九百有奇一
日洪水暴漲份登城祝曰郡政有失守溺死亡恨百姓
何辜翌日水退改揚州值金人入寇檄諸路兵勤王解
亳州圍諸援兵至者撫馭有法莫敢剽掠維揚民獲安

遷龍圖閣學士

閩書叅萬
歷府志

楊胙字持正閩縣人元祐六年進士元符初以渭州推官

攝長汀縣催督租賦不擾而集盜賊嘯聚捕治首惡境
內肅清明年之渭州道由京師上書論紹聖奸臣以元
祐爲讐編名黨錮貶死故老大臣成廢后之謀戮上書
之士日食葍見饑饉薦臻皆由於此言甚切直知建陽
大觀間卒於建寧節度推官

閩書

劉渙字孟潛閩縣人太子洗馬仲甫之孫隱釣北溪之上
歌詩自娛元祐中鄉人千餘薦之郡守許懋乞應逸民
之詔懋聞於朝渙力辭不就子達夫

閩書

達夫字宣子元豐中入太學以父渙年老歲一歸省父

福州府志

卷四十九

人物列傳

十一

丙子年補刻

卒遂無仕進意隱居北山數十年崇寧中舉遺逸有司
以應詔授松江簿擢溫州教授有薦於朝者召見將任
以中都官辭曰非志也遷越州教授卒

閩書

辛炳字如晦閩縣人元符三年進士累官監察御史兼權
殿中侍御史先是蔡京廢發運使轉般倉爲直達綱舟
人率侵盜沈舟而遁戶部受虛數人畏京莫敢言炳極
疏其弊且以變法後兩歲所得之數較常歲虧欠一百
三十有二萬支益廣而入寢微乞下有司計度京怒以
炳爲沮撓責監南劍州新豐場尋提舉洞霄宮起知

州移無爲軍靖康初入爲兵部員外郎高宗卽位除左
司員外郎辭未幾起直龍圖閣知潭州紹興二年復以
侍御史召連疏三省所行乖失數十事請論大臣勿廢
都堂公見之禮時福建八州添差至百八十餘員炳言
艱危多事之時冗食之官無益當罷從之蘇湖地震下
詔求言炳言大臣無畏天之心何事不可爲其言甚峻
由是宰執呂頤浩居家待罪炳劾罷頤浩知樞密院事
張浚召赴行在炳論其敗事誤國浚坐落職除御史中
丞時方遣使議和炳方言金人無信和議不可恃宜講

福州府志

卷四十九

人物列傳

三

丙子年補刻

求守禦攻戰之策以疾請外除顯謨閣直學士知漳州
未赴而卒詔炳任中執法操行清修今其云亡貧無以
葬賜金帛贖其家贈通議大夫

宋史

陳粹字伯光閩縣人元符中知汀州因俗制弊崇寧間遷
建學舍奏課爲天下第三賜書褒罷民借留之九年

閩書

卓祐之字長吉閩縣人歷秀州判官生而正直自謂死當
爲神及卒里人卽其居祀之建炎三年建寇猖獗端平
中邵武山寇發重慶中汀寇發祐之皆示靈異殲賊朝

廷立廟賜侯爵

閩書

李英字積仁閩縣人大觀三年進士靖康初待次提舉兩浙常平州禁卒害其帥柳述古以叛芑徒步諭以禍卒感動請勤王自贖擢直秘閣建炎初提點福州刑獄值葉儂入寇攻豐樂門芑登陴諭之皆去范汝為反鄉民張毅乘亂嘯聚襲古田帥程邁使往招之芑復單車入壘諭使捕汝為自劾賊平除知泉州終左中奉大夫

正德府志

陳葵字伯嚮閩縣人大觀四年釋褐蔡京籍元符中上書王定等十九人奏乞編置葵其一也謫居衡州三年雷

福州府志

卷四十九 人物列傳

三

震元祐黨人碑得放還徽宗詔有司許依原甲注官授樂清尉再調建州以陳瓘門人復為京黨劾罷高宗即位訪求元祐黨人胡世將孟庾宣諭福建以葵應詔授承事郎將作監丞尋召對除諸王宮教授踰年又以趙鼎黨罷歸葵屢遭蹶而操尚不改時論高之

萬歷府志 參榕城景

物考

朱倬字漢章閩縣人宣和六年進士調宜興簿張浚薦其才召對除福建廣東西財用所屬官宣諭使明彙再薦於朝與丞相秦檜忤出教授越州用張守薦除諸王府

教授梁汝嘉制置浙東表攝叅謀有羣寇就擒屬倬鞠
問獨竄二人餘察其無辜釋不治通判南劍建有寇阿
魏衆數千倬賞募擒獲境內迄平除知惠州陞辭高宗
問卿久淹何所既知厄於檜愀然慰諭目送之旬日閒
除國子監丞尋除右正言累遷中丞倬每上疏夙興露
告然後敢聞奏疏凡數十率焚其草其大者如發倉廩
蠲米價減私鹽覈軍食皆有裨於時知貢舉遷叅知政
事紹興三十一年拜尙書右僕射金兵犯江倬陳戰備
應三策又策敵三事皆如所料倬屢求去詔以觀文殿

福州府志

卷四十九 人物列傳

十四

大學士提舉江州太平興國宮孝宗卽位降資政殿學
士明年致仕卒復舊職恤典如宰相贈特進諡忠靖孫
著淳熙進士吏部尙書

閩書正德
府志合纂

鄭必明字南仲閩縣人紹興五年進士宰遂昌以儒雅飭
吏事好賢下士以名教爲先修學宮謹課試風動四境

崇禎處
州府志

黃瑀字德藻閩縣人紹興八年進士仕饒州司戶叅軍歲
旱郡檄視屬縣民田當免租者瑀請免什九而他縣以
什一告太守洪皓疑之却瑀所上書瑀曰官可罷文不

可更也調湖北轉運司主管帳司以薦改知永春縣承
寇亂後瑀蠲負釐籍履畝均稅罷民間無名賦治學館
刻詞以厲學者發摘隱伏邑以大治遷兩江轉運司幹
辦公事有獻鬻公田之策者檄瑀視之極言其非便權
知華亭縣歲大饑瑀不俟報發廩粟賑之全活以萬計
擢監察御史在臺時與殿中侍御史杜莘老雅善一日
杜以瑀疾來省連問不應乃大呼曰吾今日擊去王繼
先矣瑀矍然曰君能任職吾不病已探枕中片紙示之
乃疏繼先罪狀甚悉繼先者以醫幸者也尋請外除江

福州府志

卷四十九 人物列傳

五

南東路提點刑獄徙轉運副使改知漳州丁內艱免喪
請就閑得主管台州崇道觀卒瑀資性剛決非義不取
自奉簡薄而奉親極厚周貧賑乏無所愛平生以直道
自任云子幹自有傳見道學

閩書正德
府志合纂

朱敏修閩縣人唐丞相敬則之裔紹興十一年尉崇安日
獲盜二百坐死者七十餘人修謂此饑民剝食爾烏可
盡繩以法量除其罪不以徼賞

閩書

彭億字宋延閩縣人紹興中知尤溪明敏有幹才建縣治
徙縣學增置學田隣封盜起民多流竄億募精兵固守

士民祠祀之

閩書

王純字長紘閩縣人紹興中知崇安縣摘發奸伏吏憚其明他日數一吏罪過吏懼賂庖人置毒炊餅中食未畢亟入解仆地卒後二日神附婢體踞榻坐請丞簿尉至斥吏杖數之曰諸公皆在好啓吾棺吏與庖人皆伏辜邑人哀祠之

閩書

葉綰閩縣人紹興十七年知龍泉令行禁止訟牒至庭燭見誠偽委曲開諭曉之以理習俗好爭教以懲忿息怒全身養生率多感化

閩書

福州府志

卷四十九 人物列傳

六

董居明閩縣人沒於王事詔賜一子出身本州以子穎聞穎後舉進士終職方員外郎

閩書

周勣閩縣人張浚帥福建辟為幕官時趙鼎貶潮州人莫敢相顧勣獨沿檄往明州為挈官寓居福之外邑坐貶

封州

閩書

林采字伯玉閩縣人淳熙中知遂昌始至一新學舍請還贍學金於郡括匿稅田於鄉以廩士旬有課季有考學者翕然向風核隱戶定稅名置都籍事無不舉

括蒼彙紀

柯春卿福州人淳熙閒宰宜春吏事精明剖決不倦太守

張栻雅器重之遷邑庠於夔江北後倅大府亦著

江西通志

吳季發字宗勤閩縣人與伯兄起巖同領淳熙鄉薦初為

司戶參軍籍籍著聲歷秘書省正字秘書丞天章閣侍

制兼右司諫喟然引退曰親沒國危奸邪據位竊祿不

去寧無愧乎遂上章引退終身不出

纂閩書正德府志

鄭湜字溥之閩縣人乾道二年進士光宗初為秘書郎因

轉對旨乞盡事親之道以全大孝嚴家法之義以正內

治明教子之方以隆基本又乞節燕飲約用度親正人

福州府志

卷四十九人物列傳

七

勤省覽慶元初為起居郎權直學士院趙汝愚罷相湜

草制有持危定傾任忠竭節等語韓侂胄以其無貶詞

惡之出知福州坐免後為刑部侍郎入偽學黨卒謚文

肅福建通志

鄭昭先字景紹閩縣人淳熙十四年進士初授浦城主簿

聞朱子講明濂洛之旨遂往遊朱門秩滿之京謁丞相

葛邲曰君浦城鄭主簿耶擊賊不受賞吾聞名久矣擢

知歸安累官左司諫議大夫知樞密院事兼參知政事

遷右丞相辭不拜立朝累旬奏疏言皆切直居政府沉

厚鎮靜以愛護人才振拔滯爲已任景獻太子
建儲昭先請以仁宗爲法上意乃決會旱災求言同列
有欲罪上書者昭先曰求言豈可以直而罪之人稱其
得大臣體卒之夕有星墜於故居論文靖有日湖遺藁
五十卷真德秀序其不事刻畫而專腹豐衍似其爲人

閩書萬歷
府志合纂

許應龍字恭甫閩縣人嘉定三九年舉進士調汀州教授累
遷太學博士時李全時青華歸附應龍入對有莽蜂是
懲養虎遺患之說後皆如所言遷國子博士國子丞宗

福州府志

卷四十九人物列傳

六

學博士理宗卽位首陳正心爲治國平天下之綱領再
遷著作郎丐外知潮州盜賊以三槍起贛州出沒江閩廣
間勢熾甚而盜鍾全相挺爲亂應龍亟調兵分扼要害
明閒牒守關隘斷橋開塹斬木塞涂蒐補親兵日加訓
閱旣而橫岡桂與相繼以持聞招捕司遣統領官齊敏
率師由漳趨潮截贛寇餘當應龍諭敏曰兵法攻瑕今
鍾寇將窮陳寇猖獗若先破鍾則陳不戰擒矣敏惟命
於是諸寇皆平端平初召爲禮部郎官兼榮文恭王府
教授力辭遷國子司業兼熀直舍人院遷國子祭酒攝

侍右侍郎兼學士院權直是日罷鄭清之喬行簡制應
龍所草也拜端明殿學士簽書樞密院事累辭會正言
郭磊卿有論疏以端明殿學士提舉洞霄官卒年八十
有一贈資政殿學士銀青光祿大夫謚文簡應龍不躁
不競不激不隨不妄薦士而亦無傷人害物之事潮州
之治最可紀也

宋史

陳公益字謙父閩縣人嘉定元年進士累官兵部侍郎兼
侍讀紹定六年御經筵詔以御製敬天法祖事親齊家
四十八條宣付史館公益等撰述箴辭附各條之下揭

福州府志

卷四十九

人物列傳

九

丙子年補刻

於緝熙殿朝夕省覽

正德府志

陳達三山人嘉定間知遂昌首謁學官引試士子一時士

風丕變囹圄空虛旣去民繪像立祠祀之

崇禎處州府志

陳岳字伯咨閩縣人嘉定間守恩州拊循勞來御民以誠
有死喪不能葬者作兩義塚別男女瘞之以薦擢本路

提刑

閩書

趙思懿閩縣人寧宗時知道州振頑俗戢吏奸期月百廢
具興寧遠民困弊望治爲之興利除害民祠之九疑廟
西碑於永福齊雲之閣

閩書

光裔福州人嘉定十二年知寧都周知民隱舉行荒政
邑俗多溺女光裔儲米為舉子倉積俸為舉子錢貧民
生女者鄰里以聞先給錢米養產母閱月抱女至庭驗
視則月給米三斗至周歲而止行之數年全活甚眾

江西通志

趙紉夫福州人嘉定十三年宗子正奏紹定四年以顛尉
攝寧都縣時石城寇黃元仲僭號狂逞紉夫葺城濠為
守禦計賊圍城登臺射之稍退率兵逐北遂禽元仲嚮
於市明年還職父老磨石紀其功尋知本縣在任能聲

福州府志

卷四十九

人物列傳

三

丙子午

益著

江西通志

戴翼字汝諧閩縣人紹定中攝南康事鼎創城壁兩新縣

治政績彰聞遷知邕州

閩書

陳希譔閩縣人紹定中為廣昌令聽訟理財談笑整辦百

廢具舉民不知役

萬曆府志

黃歲閩縣人紹定中知南雄州政先教化尤重表揚忠節

久旱禱雨歷三晝夜歲以大稔秩滿遷廣東提舉奏蠲

本州歲上供銀三千餘民祠祀之

閩書

王洽雍閩縣人官劍浦丞勤恤民隱廉聲大著子光大丞

仙遊亦以清白著弟介雍任光澤丞刻志勵操途遇窮民解衣給之及去任挈一一徒步歸閩書

潘昉字庭堅福州人端平二年策進士昉對曰陛下承休上帝馭德匹夫何異爲人子孫身荷父母劬勞之賜乃指豪奴悍婢爲恩私之地欲父母無怒不可得也又曰陛下手足之愛生榮死哀久不得視士庶人如此一門之內骨肉之閒未能親睦足以僮僕疾視隣里生侮宜厚東海之恩裂淮南之土以致人和時對者數百人庭堅語最直會殿中侍御史蔣峴劾方大琮劉克莊王邁

福州府志

卷四十九

人物列傳

三

併誣昉調鎮南軍節度推官衢州推官歷浙西提舉常平司遷大學正旬日出通判潭州日食應詔上封事曰熙寧初元日食詔郡縣掩骼著爲令故王一坏淺土其爲暴骸亦大矣請以王禮改葬又移書丞相游似申言之似申善其言方將收用之而昉卒昉所爲文脫去筆墨踐徑廷試策傳京師紙貴識者皆曰子韶龜齡輩人也所著有詩集古樂府宋史蔡正德府志

朱挺字烈仲閩縣人端平中知循州行鄉賓舉課試首先風教申明節制適外寇經循遣兵捕絕之閩書

彭彥堅字圖器閩縣人端平中知循州省檄敷糴彥堅請減五千斛轉輸之費不及官民捐錢數十萬作新學舍且蠲佃丁困夫役者五十餘家不隸學官營繕其去也士民相與祠焉閩書

鄭良臣閩縣人淳祐二年知潮州民苦白丁錢據籍取辦雖死徙不得蠲豁良臣更無和之增置田租於學宮及韓山書院為養士費閩書

黃唐字雍甫閩縣人為考功郎韓侂胄為其父請諡唐不肯覆議遂辭官萬歷府志

福州府志 卷四十九 人物列傳 三

陳登閩縣人淳祐開知新昌縣鎮之以靜撫之以寬有豈弟之風踰年政清訟簡民懷其惠萬歷府志

吳秀發字宗魯閩縣人寶祐元年進士判饒州政務便民尤留意平獄訟出犯罪吏民給以農具使耕種凶歲賑給饑民全活甚多元兵南寇疏論屯田戰守之計後以功進中散大夫光祿卿加松江制置仍前判州事正德府志

陳琥字少嚴閩縣人寶祐元年進士為南豐令臨政惟痛繩羣吏嘗曰民不得安者吏為之蠹也取吏之巨猾曰三陳者斷手足以令於是羣吏股栗百姓歡呼有問者

曰公以恕齋自號而竟不恕何也對曰吾恕於民耳
可恕乎識者以為名言同郡趙以孚字用甫寶慶初亦
令南豐承嚴密之後一以儒雅寬大撫柔其民崇學校
簡刑役邦人亦懷之

萬歷府志

林潮孫字伯鳳閩縣人寶祐間令建寧蒞事精勤深達民
隱邑鄉飲酒禮久廢潮孫復舉行之

閩書

王光亨字汝通閩縣人官袁州司務蔬糲自給不取一錢

閩書

王勳字克壯閩縣人景定進士官樂昌令心澹欲寡遇事

福州府志

卷四十九 人物列傳

三

剖决若流久之公庭晏然日焚香讀書而已秩滿去或

問舟人何所載曰吾販一船清耳

萬歷府志

林畔閩縣人景定二年以太常丞攝惠州事嘗察盜得其
情諭之曰人性未嘗不善汝亟自新因遺錢三緡釋之

盜感泣自是境內無盜

閩書

王霖龍福州人景定五年任浦江知縣奉公勤政脩壞起
廢有兄弟訟者霖龍愀然曰是明倫之化未孚也令與
有責乃授以孝經朝夕誦習由是感悟和好如初遠矚
村氓久不輸賦霖龍移文呼之氓欣然相率拜庭下曰

吾侯清聲稔矣何幸得親見耶悉完積負後轉奉

康陽續志

林稼翁閩縣人德祐中以薦辟授廣東鹽運司奏差恭而

有禮才德著聞

閩書

洪振龍閩縣人尉建寧剛明難犯縣有大辟令欲貸之振

龍不可竟直其獄所至屏絕餽送鷄犬不驚

閩書

曾噩字子肅閩縣人初尉上高有聲後知潮州與丁允元

陳宏規前後稱賢守官終大理寺正

閩書

王孔碩閩縣人任沿江尉以儒學飭吏廉明剛正

閩書

福州府志

卷四十九 人物列傳

五

李大訓字君序閩縣人父士龍仕至直秘閣以老居里中

後生師之大訓初丞廬陵歷知安遠龍泉二縣在倥偬

中力於事功再知歸善以安靜脩禮教為務所至稱廉

勤整辨論者謂其儒而不腐吏而不俗云

閩書參正 德府志

林谷字聲之閩縣人家泉州知上虞縣通判嚴州以倪思

薦召審察時權臣專國有欲媚之者挽谷輸金為壽谷

嘆曰資生攻苦俸錢尚不敢多取焉有以奉權要若然

審察餌我耳徑注潮州通判歸谷善審訟或疑其以數

鈞素笑曰吾臨事無私心子灝知寧化縣

閩書

元

卓琰閩縣人至大四年教授寧波積學工文作新啓迪寒

暑不懈閩書

賴天賦閩縣人至正中舉人任興寧簿縣有賊屯兵龍母

岩出與戰敗績賊追執之不屈死閩書

明

趙明字景純閩縣人洪武中由國子生拜監察御史與同

列七人俱忤旨處以大辟明獨以狀貌英偉特赦為民

三十一年以薦授閩清縣學訓導永樂初擢知上饒縣

福州府志

卷四十九

人物列傳

五

丙子年補刻

乞仍舊職以便養親不許既抵任悉心民事正風俗革
吏弊均賦役息盜賊治聲茂著在官三載日惟二食及
卒衣笥中餘白金一兩邑人哀之如失父母立廟祀焉

明人
物考

林基字孟高閩縣人幼嗜學踐履篤實鄉邦推重洪武初

聘為連江訓導師道甚嚴施教有方尋有薦于朝者太

祖親試問之基對有忠讜言超授吏部員外郎數論國

家大計時妻子皆留于家惟從學陳邵二生及一僕隨

寓未幾為同官所累下獄基恐禍不測乃抽簪刺腹而

死時年方三十

正德府志

陸維遠福州人由人材洪武初任象山縣丞十年涖政嚴

肅處已廉潔吏民畏憚目為鐵面卒於官

寧波府志

胡龍閩縣人洪武戊辰進士任星子知縣廉勤公正蔬食

布衣除草吏弊民深德之擢監察御史

江西通志

黃澤閩縣人永樂十年進士擢河南左叅政南陽多流民

拊循使復業嘗率丁役至北京周恤備至久之調湖廣

仁宗卽位入覲言時政多見采納宣宗立下詔求言澤

上疏言正心恤民敬天納諫練兵重農止貢獻明賞罰

福州府志

卷四十九 人物列傳

五

遠嬖倖汰冗官十事其言遠嬖倖曰刑餘之人其情幽

陰其慮險譎大奸似忠大詐似信大巧似愚一與之親

如飲醇酒不知其醉如噬甘腊不知其毒寵之甚易遠

之甚難是以古者宦寺不使典兵干政所以防患於未

萌也涓涓弗塞將為江河此輩宜一切踈遠勿使用事

漢唐已事彰彰可監當成祖時宦官稍稍用事宣宗寤

以親幸澤於十事中此為尤切帝雖嘉歎不能用也事

後設內書堂而中人多通書曉文義宦寺之盛自宣

始宣德三年擢浙江布政使復上言平陽麗水等七

銀治宜罷并請盡罷諸坑冶語甚切帝歎息曰民困甚此朕何由知遣官驗視酌議以聞澤在官有政績然暴怒鹽運使丁鏊不避道撻之為所奏巡按御史馬謙亦劾澤九載秩滿自出行縣歛白金三千兩償官物且越境過家遂逮下獄正統六年黜為民初澤奏金華台州戶口較洪武時耗減而歲造弓箭如舊乞減免下部議得允而澤已罷官踰月矣

明史

吳穎字克懷閩縣人永樂初授全椒教諭善形家言築文筆峯卒致飛語禍不測乃率諸生登明倫堂曰始禍者

福州府志

卷四十九 人物列傳

七

予也予死若等獲生矣遂自縊諸生王冕等為卜葬南

山之陽

江南通志

外真字汝實閩縣人永樂三年舉于鄉以楊榮薦遷庶吉士入經筵侍書授慈谿縣上書言時事成祖嘉納之賜白金文綺鞍馬時妖賊龔伯諒詞連無辜甚眾真辯釋八十餘人丁艱服闋補江寧令旋改宜興以勤勞卒于

官

萬歷附志

林碩字茂宏閩縣人永樂壬辰進士拜監察御史出按山東宣德初按浙江毅然負澄清志尋遷浙按察使時

實裴可烈為奸碩將繩以法可烈怒訴于上誣碩毀記
書被逮至闕言臣前為御史官七品今擢按察使官三
品臣惟恐不能報上恩實無誹謗語小人不便欲去臣
唯陛下裁奪上動容曰朕固未信是以面問汝即命釋
之復其官勅切責可烈碩忤左右處雷霆下卒能自直
士論壯焉在浙久人懷其惠正統三年誤引赦例出人
死僉事耿定劾之逮訊還職官終廣東布政使明史
鄭珞字希玉閩縣人永樂乙未進士選庶吉士授刑部主
事宣德中擢寧波知府中官裴可烈以公事至郡貪暴

福州府志

卷四十九 人物列傳

三

不法珞上其罪狀詔寘可烈於法未幾丁內艱歸適海
寇為患郡民千餘人上疏乞留詔奪情起之珞辭不已
既復任黜賊吏抑豪強令行禁止發奸摘伏治績為兩
浙最滿秩陞浙江布政司左叅政未上卒於家明人
物考
劉麒字伯禎閩縣人永樂乙未進士授御史宣德初知南
康府作興士類勤課農桑政治聿興士民愛戴之江西
通志
采光閩縣人由明經為南海縣簿泣政初每事遜于尹及
攝邑篆以廉明稱吏不敢欺民歌之曰南海簿性不貪

百鳥鳳人中難萬歷
府志

元美名鏐以字行閩縣人永樂中登進士第宣德中授
上猶知縣邑土田磽瘠民貧無以供賦稅元美請于朝
核其無田及有田而汚萊者悉蠲之邑人舊鮮知學元
美政暇輒集序庠弟子員親爲講經科第始不乏人山
峽中有盜時出剽掠元美撫以恩信後皆向化正統中
擢寧海知州州置兩衛武職習爲民害元美密條其不
法以聞繩之其害遂戢有二僧至境以術惑衆執而訊
之乃他郡越獄盜也人以爲神值歲旱蝗躬巡歷賑恤
復奏減其賦天順初授撫州知府年六十致仕成化初

福州府志

卷四十九 人物列傳

元

詔進階亞中大夫

分省人 子瀚

瀚字亨大成化二年進士改庶吉士授編脩再遷諭德
請急歸宏治初召修憲宗實錄充經筵講官稍遷國子
監祭酒進禮部右侍郎掌監事如故典國學垂十年饌
銀歲以百數計悉貯之官以次營立署舍師儒免僦居
由 始歷吏部左右侍郎十三年拜南京吏部尚書以
災異率羣僚陳十二事御史王獻臣自遼東逮下詔獄
儒士孫伯堅等夤緣爲中書舍人瀚疏爭忤旨乞罷不
許已奏請重根本曰保固南京曰佑啓皇儲曰撫綏百

姓曰增進賢才正德元年四月吏部尚書馬文升去位
言官邱俊石介等薦瀚帝用侍郎焦芳乃改瀚南京兵
部叅贊機務命未至瀚引疾乞休因陳養正心崇正道
務正學親正人四事復詔慰留時災異數見瀚及南京
諸臣條時政十二事語涉近倖多格不行瀚素剛方與
守備中官不合他內臣進貢道其地者瀚每裁抑之遂
交譖於劉瑾會劉健謝遷罷政瀚聞太息言官戴銑等
以留健遷被徵瀚獨贖送瑾聞益恨明年二月假銑等
獄詞謫瀚浙江叅政致仕旋指爲奸黨瑾誅復官致仕
而自守介然卒年八十六贈太子太保謚文安子九人

庭梈庭機最顯

明史

福州府志

卷四十九 人物列傳

三

予月廩歲隸如故事尋命有司歲時存問瀚爲人謙厚
庭梈庭機最顯
庭梈字利瞻瀚次子宏治十二年進士授兵部主事歷
職方郎中吏部尚書張綵欲改爲御史固謝之乃以爲
蘇州知府頻歲大水疏請卹織造罷繁征割關課備振
再上始報可遷雲南左叅政正德九年以父老乞侍養
時子炫已成進士官禮部事爭亦謁假歸三世一堂鄉
人稱盛事嘉靖初父憂服闋起官江西歷湖廣左右布

政使舉治行卓異擢右副都御史巡撫保定諸府歷工部右侍郎應詔言郊壇大工南城西苑相繼興作請以儉約先天下又因災傷乞撤還採木燒造諸使進左拜尚書加太子太保時帝方大興土木功庭楫所規畫多稱意會詔建沙河行宮庭楫議加天下田賦爲御史桑喬給事管見所劾乞罷歸卒贈少保諡康懿

明史

庭杓字利高瀚子以蔭入太學授南都事陞經歷慶遠知府出牧遠方能以清靜宜民滿九載將赴吏部卒于

途行李蕭然慶遠民思而祀之

舊福建通志

福州府志

卷四十九

人物列傳

三

庭機字利仁瀚季子嘉靖十四年進士選庶吉士授檢

討遷國子司業嚴嵩用事工爭附其門庭機寓與鄰未

嘗私謁歷南祭酒太常卿工禮二部侍郎在南十年銓

部每有推轂嵩輒擠之嵩罷始晉南工部尚書穆宗卽

位改禮部俱官陪京時子爓已爲祭酒遂上疏乞歸先

是振武營兵變戕殺兵部侍郎黃懋官人心洶洶庭機

時爲工侍攝篆持大體不苛餉以時給亂遂弭工部歲

供內府費鉅萬計裁其濫溢中貴人斂手性廉靜不近

名內行修飭自奉如寒士卒年七十六贈太子太保賜

祭葬謚文僖有世翰堂稿子熾燧

明史叅福
建通志

炫字貞夫庭棉子正德甲戌進士授禮部主事嘉靖初以議大禮忤執政家居炫才識通敏詩文富麗賓客填門朝夕觴咏與邑士袁達張萬里相賡和每一篇出人傳誦之後起官至通政司叅議子世璧自有傳見文苑

萬歷
府志

熾字貞恒嘉靖二十六年進士選庶吉士授檢討充景恭王講讀官時嚴嵩專軸熾不與通會景恭王之國嵩欲改熾長史遣人諭意熾弗顧嵩敗累擢洗馬兼侍講

福州府志

卷四十九

人物列傳

三

分校永樂大典纂脩承天入志陞祭酒書成加太常卿仍管國子事隆慶改元擢禮部右侍郎兼學士經筵講官中官奏修九陵熾奉旨往勘還奏惟長陵應修省費數萬屬邊警條上備邊七事改吏部右侍郎仍日講前後經筵多所規諷首相徐階甚倚重之俄調南京吏部署禮部事魏國公徐鵬舉廢長立幼熾持不可竟封其長邦瑞萬歷改元進南工部尚書改禮部以母喪歸熾立朝議論風采傾一時與張居正同爲徐階所知及居正在政府遂謝不見爲所擠衣布蔬食齋居一室問業

之屢常滿戶外母喪服闋以父庭機篤老侍養家居七年先父卒贈太子少保賜祭葬諡文恪明代三世爲尚書並得諡文林氏一家而已所著有學士集經筵講章子世言世勤世言字天廸官戶部員外詩詞清麗有叢桂堂集世勤自有傳見孝義

明史叅福
建通志

煙字貞曜嘉靖四十一年進士授戶部主事轉員外郎嚴嵩執政請告里居數載隆慶初補駕部員外郎去烙馬之弊遷庫部郎出守盱江加意撫循屬邑輸賦以縣封識轉文解省不覓一錢聽斷敏決郡中謂之林一升

福州府志

卷四十九

人物列傳

三

以母艱歸補蘇州知府時張居正奪情迎母之京道出姑熟煙不爲禮入覲未嘗至其門尋遷粵西副使值兄嫌卒請急歸養久之起兵備三衢轉叅粵藩所至有聲擢太僕少卿因災異極陳礦稅之害請釋逮繫諸臣不報隨請假歸起南太僕卿轉大理遷刑部侍郎晉南工部尚書累疏乞骸歸煙爲人襟度高曠而持正不阿有難進易退之節孝友之行通於神明家世詞臣文學冠冕海內而博綜不倦雖奕葉貴顯清約不異韋布年七

十七本所著有覆瓿諸集

明史叅福
建通志

翁瑛福州人幼聰敏四歲能誦古詩丁酉薦于鄉洪熙乙巳瑛得仁化教諭以興起文教自任日進諸生講學其中時隣近失火勢將入學舍東北風急瑛稽顙籲天俄風返火息得不焚遭外艱歸卜葬父于石廊山山多虎且陰雨浹旬人無所用力瑛號泣禱于天明日雨止虎亦斂跡人謂孝感所致服滿典教桐鄉時桐鄉新置縣未有廟學瑛度地鳩材始作之又以內艱歸正統丙辰陞國子助教帝視學謁先聖明日入謝各賜衣一襲錫宴于奉天門瑛雍容進退動中禮度四月陞翰林檢討

福州府志

卷四十九 人物列傳

三

分省人物考

陳叔剛名棖以字行閩縣人永樂辛丑進士宣德初拜監察御史嚴重不苛預修太宗仁宗實錄遷翰林修撰未幾丁內艱廬於墓側哀毀逾禮服除修宣宗實錄充經筵講官尋陞侍讀以父病乞歸省卒叔剛性溫雅忠厚以文行推重於時有綱齋集

分省人物考

弟叔紹子煒

叔紹名振以字行精春秋學少無宦情劉忠愍球與其兄叔剛善勸之仕補博士弟子員三十矣正統乙丑舉進士選監察御史景泰初朝廷多故臺中建白彈擊皆

叔紹率先擢湖廣副使叔紹有孝行母病嘗嘗以藥
劇叔剛沒孤煒甫十歲叔紹撫成之閩人至今稱焉

詩集

煒字文耀天順庚辰進士成化初選監察御史煒風格
峻整正直寬平號敢言錦衣指揮使門達恃寵干政屢
起大獄煒疏其諸奸利狀上投達嶺表中外快之命按
南京給事中王徽因論大學士劉吉外遷煒特疏論救
帝意稍解由是直聲大震改督學北畿遷江西副使歷
按察使右布政江右俗素喜訟煒屢折疑獄得其情赴

福州府志

卷四十九 人物列傳

三五

煒訴者人人以爲不冤有盜越獄同僚欲罪守卒故縱
當死二十七人煒不可竟從減論弋陽樂平二邑人爭
陂久不決煒爲權其利樂邑民得決水溉田萬餘畝而
代弋陽輸賦二邑人咸便之尋轉浙江左布政使未上
卒于官惠安彭韶嘗稱煒有澄不清撓不濁之量云

萬歷

府志

陳傅字巖說閩縣人宋陳韡八世孫也正統丙辰進士授
刑科給事中鯁直言事值邊警進安邊四策又劾會昌
伯孫忠驕恣應城伯孫傑貪淫福建叅議顏擇之科索

御史丁俊阿縱都督王瑜撓鹽禁皆逮問中外服其風
采奉命冊封琉球餽遺一無所受勲戚周氏奪民田
傳按之追田還民繩其諸不法者刑部尙書魏源庇周
氏論傳凌蔑皇親下詔獄科臣交章論救謂貴戚當抑
以全國恩直臣當容以彰國紀竟謫戍大同己巳英宗
至大同詔文武官謫其地者賜復職而傳已卒後追贈

太常寺少卿

萬歷府志

趙榮字孟仁其先西域人元時入中國家閩縣舅薩琦官
翰林從入都以能書授中書舍人正統十四年十月也

福州府志

卷四十九

人物列傳

三

先擁上皇至大同知府霍瑄謁見慟哭而返也先遂犯
京師奉上皇登土城邀大臣出迓榮慨然請行大學士
高穀拊其背曰子忠義人也解所佩犀帶贈之卽擢大
理寺少卿充鴻臚卿偕右通政王復出城朝見進羊酒
諸物也先以非大臣遣之還而邀于謙石亨王直胡濙
出景帝不遣改榮太常少卿仍供事內閣景泰元年七
月擢工部右侍郎偕楊善等往救書無奉迎語善口辯
榮左右之竟奉上皇歸進左侍郎行人王宴請開沁河
通漕運得下廷議言不便遣榮往勘還亦言不便尋奉

敕會山東河南三司相度河道衆以榮不由科目慢之榮怒多所撻辱又自攝衣探水深淺三司各上章言榮單馬馳走驚駭軍民杖傷縣官鬻廩米多取其直撫按薛希璉張琛亦以聞章下治河僉都御史徐有貞覆奏法司言榮雖失大體終爲急於國事鬻米從人所爲諸臣侮大臣抗敕旨宜逮治希璉琛亦宜罪帝令按臣責取諸臣供狀宥之天順元年進尚書曹欽反榮策馬大呼於市曰曹賊作逆壯士同我討罪果有至者卽率之往賊平英宗與李賢言歎榮忠命兼大理寺卿食其俸

福州府志

卷四十九

人物列傳

三七

七年以疾罷成化十一年卒賜恤如制

明史

孟圮字廷振閩縣人正統己未進士授戶部主事扈從上木刃矢貫臂墮積屍中得不死再爲禮部主事易儲之議郎中章綸御史鍾同諍尤力同杖死綸死復蘇幽之獄圮復繼言之自分必死而偶不及禍英宗居南內三年羣臣無一朝謁圮因旱極言忤旨謫知萊州又知廬

州謝事歸

萬歷府志

林渭閩縣人宣德元年鄉薦正統中知海豐縣惇篤而介吏民不忍欺在治未三載利興弊革庶務一新卒於官

萬歷
府志

薩琦字廷圭閩縣人宣德庚戌進士選庶吉士授編修預
修仁宗實錄歷禮部侍郎兼詹事卒于官琦事親孝為
人耿介持正仕二十年不以家累自隨其先本色日人
琦一變其俗喪葬皆用朱子家禮士論賢之天順元年
賜祭葬建祠西郊廉山

萬歷
府志

吳復閩縣人由吏員任吳縣主簿改豐濟倉大使宣德九
年知府况鍾知其能擢知吳縣有治績陞工部主事侍
郎周忱巡撫江蘇辟為屬椽累官通政司右通政尋遷

福州府志



卷四十九

人物列傳

三

工部右侍郎天順甲申致仕歸卒復涖官淳厚明敏綽

著能聲

分省人物考
參蘇州府志

李叔義字文宜閩縣人正統戊午以吏應順天鄉薦歷廣
西訓導選御史官終貴州僉事年九十九卒叔義執憲
能舉其職工于詩亦善丹青人得尺幅競以為寶

萬歷
府志

車寧字子靜閩縣人正統戊辰進士歷戶工二部主事南
吏部郎中出為湖廣叅議陞廣東叅政適保靖宣慰二
土司負固不受約束寧單車造之諭以朝廷威德眾皆
叩首謝苗崗遂安遷廣西左布政使土蠻叛服不常或

謝勳除軍後軍車論之變悉歸附得編戶六萬八千四百口歲徵租五千七百八十餘石事聞賜金幣寧多學強記磊落有權畧居家尤篤孝友云

舊福建通志

高昇字景初閩縣人正統甲子舉人試春官不偶即歸隱肆力經史教授生徒四十餘人多所造就昇德性温和與物無競自奉甚約樂道人善鄉隣有鬪輒就求直後

以子文達恩封承德郎戶部主事卒年八十有七

正德府志

謝睿字元思閩縣人正統丁卯鄉薦景泰閒授靖安教諭改國子監學正陞助教監有諸生蔬菜錢久侵沒睿糾

福州府志

卷四十九 人物列傳

三十九

其弊奉旨勘鞫祭酒以下皆奪職特授睿檢討留典國學卒時與少叅琚皆以方廉著名鄉黨稱為二謝云

萬歷

府志

林榮字尚仁閩縣人景泰庚午鄉薦宣德閒為海鹽諭以經義德行為教諸生貧而具食補者輒謝絕之卒於

幾無以斂士哀慕焉

萬歷府志

張潛字孔昭閩縣人弱冠充按察司承差授鄴城驛丞

泰癸酉應河南鄉薦除沐陽訓導潛明經學勤教人

沐人未知學科第久曠乃選子弟親授以經滿九年

士陳秉彝舉人王瑀張鵬輩皆出其門士風大振

正德府志

邵銅字振聲閩縣人景泰甲戌進士授監察御史大著風

裁英宗復辟曹石擅威福銅與同列連章劾之英宗怒

下錦衣獄謫知壽光改博羅蒞政嚴明門無私謁釐革

弊竇吏卒不敢為奸嘗督造冊籍銅括為易見圖至今

博羅傳以為式撫臣薦其賢擢知温州後致仕卒

萬曆府志

鄭同字本初閩縣人景泰甲戌進士初授祁門縣清慎寬

簡興學愛民擢海州守六年政教兼施以憂去民為立

一清坊官至太僕寺丞

福建舊志 卷四十九 人物列傳

福州府志

卷四十九

四

高瑤字廷堅閩縣人景泰丙子鄉薦授荆門州訓導改宜

興成化初詣闕下陳十事其一請復景帝廟號畧曰在

昔已巳之變先帝蒙塵社稷如髮皇上方在東宮使非

邸王繼統國有長君則禍亂何絲而平邊庭何絲而服

鑿輿何絲而還六七年閒海宇寧謐年穀屢登元元樂

業其功不少迨夫先帝復辟貪天功者遂加厚誣俾一

切典禮俱從減殺人心猶鬱天意可知伏望特飭禮部

集議追加廟號以盡親親之恩時左庶子黎淳極詆景

帝引魯隱公為比帝曰景泰往過朕未嘗介意豈臣子

所當言淳爲此奏欲獻諂希恩耶議遂寢然帝終感瑤
言久之竟復邨王帝號瑤後知番禺縣多異政發中官
韋眷通番事沒其貲鉅萬於官眷憾甚誣奏於朝瑤及
布政使陳選俱被逮士民泣送者塞道瑤竟謫戍永州
釋還卒瑤喪父事母盡孝居家二十年無異寔素著有

松塢集

明史叅萬
歷府志

鄭克和以字行閩縣人天順丁丑進士歷戶部主事員外

郎中有清名任二十餘年卒無以爲歛

萬歷
府志

張濬字文哲閩縣人天順己卯鄉薦授寧國教諭成化中

福州府志

卷四十九

人物列傳

四

改四會尋擢饒平令興學勸農廉能公恕縣有斗級謝
全頑梗亂政濬笞殺之全子訟憲府濬不能自白鬱惋
病疽卒家人垂橐歸先是濬在四川會有海寇嘗以策
干總兵陳銳銳檄濬督揭揚四邑兵禦之賊平功未錄

人惜焉

萬歷
府志

吳伯璋字伯璋閩縣人天順己卯鄉薦授宣城訓導改全
州遷樂清教諭三典教職勤于誨誘諸生有美質者汲
汲造就之性恬淡不以一毫干人所在有司禮重焉全
州大司空蔣昇與其弟少傅冕俱出門下冕受教尤深

粵人稱之萬歷府志

何暹字源潔閩縣人天順己卯舉人庚辰乙榜授麻城

導改泰和遷國子學錄師道修立操履端方士多向慕

痛父先棄養奉母鄭孝鄭有疾焚香籲天祈以身代官

國學未久解官歸養焉四子繼高顯岡繼周皆登第人

稱為四桂以子顯恩贈南京戶部郎中正德府志

顯字繼善成化丁未進士歷戶部郎中擢知湖州屬邑

安吉孝豐民頑獷顯奏改吉安為州治其尤無良者一

方遂安胡安定書院祭田久入于僧寺顯歸其裔孫明

福州府志 卷四十九 人物列傳 聖

仍增祭田湖人頌焉陞浙江叅政以忤逆瑾編管自在

州瑾誅起揚州遷貴州叅政有事鎮算調發給餉以功

受賞性豈弟敦樸經學精深奉親睦族常極力為之蒞

官至誠愛人去後為立碑正德府志

繼周以字行宏治壬子鄉薦知萊蕪縣廉慎有為訟無

留滯時有奸民暴橫悉置於法境內肅然嘗建書樓以

教生徒旱蝗齋禱天雨蝗盡死遷知膠州民為立石官

終南昌府同知萬歷府志

李廷美以字行閩縣人天順庚辰進士歷刑部主事員外

郎左遷蘇州通判陞同知知府致仕廷美為人剛毅有過面折不恕在刑曹讞獄詳明士論推服久于蘇有政績居家尤儉約善古詩文

正德府志

鄭觀字建中閩縣人天順甲申進士歷戶部主事員外郎

郎中移疾于家養親十年親終起湖廣左叅議未幾自

陳致仕觀寬厚平易在山林足跡不履城市對人未嘗

一道宦蹟卒年八十

正德府志

王俊字世美閩縣人成化丙戌進士選庶吉士改戶部員

外郎陞袁州知府風采嚴整政令明肅務持大體不忽

福州府志 卷四十九 人物列傳 三

輕細凡豪家武斷者雖有倚恃一繩以法吏民畏憚修

學宮建大成殿新明倫堂課授生徒時臨稽閱一時士

風翕然振起九載治平陞廣東叅政撫化獐狃廣人深

戴之

袁州府志叅萬歷府志

黃憲字世用閩縣人成化丙戌進士令武寧當塗江山二

縣廉明古樸仁惠及民在武寧時民有釣致流屍折其

脇骨以誣讎家獄久不決憲視之曰令毆傷也何以骨

外拊誣者遂服寧人號為水鏡轉工部主事改戶部

運河築堤城垣悉底績以不合於時歸時人為之語曰

黃部郎及故鄉攜空囊

萬歷府志

鄧珙字宏中閩縣人成化丙戌進士令常熟為政嚴明細強扶弱邑有巨豪馬凱每一令至即以厚貲相結納恣為暴橫珙廉其罪狀箠殺之都御史畢亨疏其實詔旌異之入為戶部郎耆民史信等詣闕乞留官終貴州參

議萬歷府志

鄭琳字文玉閩縣人成化戊子領鄉薦知象山縣剛方廉介權貴不敢干以私太宰屠某目曰此硬頭官也時人呼為鄭硬頭孫述字世美嘉靖庚戌進士仕至江西叅

福州府志

卷四十九

人物列傳

四

議剛介不能俯仰綽有祖風時權相嚴嵩奪民漑田湖塘民訴於述述命各荷鍤以從羣共開掘頃刻還民嵩怒甚人皆為述危未幾嵩敗述得無恙

萬歷府志

陳紀字叔振閩縣人成化己丑進士選庶吉士改河南道監察御史巡視京城按兩浙鹽法改北直督學轉陝西按察使清滯獄八百餘人宏治中以僉都御史巡撫宣府黜叅將之黷貨者威令振肅邊境晏如尋人為副都御史致仕卒賜祭葬紀天性孝友歷內外憲職執法不阿時中貴人李廣擅威福衆多造其門紀獨不往廣

衆恐并得罪咸夜見壽寧侯求解釋時論益重紀焉

府志

周熊字世祥閩縣人成化己丑進士授刑部主事遷員外郎時中都留守穆盛滯僭豪橫其兄子上變京師勲貴多其姻黨衆莫敢往治熊毅然獨任至則逮其妻孥籍其僭用器物勲貴欲有所貫熊持益堅竟論如法會考察有中傷者坐以疾致仕卒以子朝佐監察御史恩贈

奉直大夫 正德府志

鄭炯字叔亮閩縣人成化己丑進士歷戶部郎中嘗奉命

福州府志

卷四十九 人物列傳

聖

總理宣府糧儲悉清宿弊權貴多不便四川歲歉爲建救荒之策寢鬻爵之議陞貴州右叅政尋有中傷左遷廉州知府勤政慎刑恤民興學吏民畏愛之 正德府志

李學字文暉閩縣人成化壬辰進士選御史以言事謫武陵丞清白自持釐革奸弊邑有巨猾羣盜附之民訴之官輒以賂免學至察其實捕致于法武陵路當四達民疲轉送學疏請所轄州郡分其勞費民甚德之尋乞

骨垂橐而歸 萬歷府志

林鑿字世調閩縣人辛卯與仲弟鑿同鄉舉壬辰鑿

士授工部主事歷戶部郎中再改吏部陞湖廣叅政廣
東右布政轉廣西左布政居母喪終制無意仕進卒年
六十五壟坦夷有器量湖廣視篆藩務叢委處之裕如
在廣抑柄臣進香之擾時議縮諸生費壟曰爲國育材
奚費焉又有窮治驛私廩者壟曰法去太甚官微祿薄
未易責之深也居官囊無餘貲所著有愧蘧集正德府志
林肇字世南成化戊戌進士授工部主事歷郎中改禮部
陞貴州右叅議卒于官肇靜密有思荊州筭商徃徃苛
細漁贏利肇至罷之僧道黃緣內降給度歲且數萬人

福州府志

卷四十九

人物列傳

吳

肇白宗伯論罷時黜其議焉

正德府志

鄧焯字廷昭閩縣人成化壬辰進士授南京刑部主事歷

郎中議獄必究情理發奸摘伏出爲雲南右叅議蠲弊

興利築嵩明城民免夷寇之患丁巳會試爲同考官多

得士有知人之鑑論貴賤禍福多奇中詩文恒追古作

厭爲時俗艱澁之語弟焯字廷耀成化閒進士入爲翰

林院庶吉士授編修預修憲廟實錄進侍講

正德府志

郭珙字元圭閩縣人成化乙未進士先尹會稽有大豪撓

法漁食閭里珙下車廉狀名數其罪置之法邑患水大

饑權宜發粟全活甚衆調秀水清操惠政如會稽時終
任皎然人不敢干以私萬歷府志

陳仲堅福州人成化丁酉舉人宏治初知麗水縣發摘如
神吏民無敢欺者凡隣疑獄上司必檄往劾實每得其
情遷廣信通判歸貧不能自存括蒼彙紀

林璿字衡玉閩縣人成化戊戌進士授膠州守改莒州擢
南京戶部員外郎後歷官遼東苑馬寺卿致政璿再爲
州俱有善政在膠斷疑獄脫無辜甚衆莒值歲饑賴以

賑救二州人皆立祠祀之膠州志

福州府志

卷四十九 人物列傳

罷

許坦字履夫閩縣人成化戊戌進士任戶部主事進員外
郎郎中坦精易學而材敏知大理府修學舍課生徒士
類感發立叢冢于郊民懷其惠致仕卒號平齋有平齋

雜稿正德府志

鄭蘊中字德輝閩縣人成化庚子鄉薦授石首教諭學邃
春秋多所造就擢貴池令與上官議獄不合拂衣歸家
居夫婦織席爲食有門生以御史按閩屢候弗見也一
指揮防海欲得善地持厚賄丐關說御史蘊中嘆曰此
言胡爲及我哉強之再三蘊中怒欲執詣官指揮乃吐

實跪請曰御史念公貧藉此爲餽耳終不納年九十餘

終福建舊通志

黃源大字子通閩縣人成化癸卯舉人正德閒任襄陽教授學博行修嚴立科條教諸生日夜不怠轉知瑞昌縣端謹沉毅有介節不爲事物屈撓興利祛弊政績丕著

明一統志

張澤字孔仁閩縣人幼失怙恃讀書自奮成化甲辰進士歷大理寺正持心公恕獄案遇當駁者必付回原問至再方議駁多賴平反有棘臺駁稿二卷陞廣東按察僉

福州府志

卷四十九人物列傳

哭

事卒于潮

正德府志

葉士美字邦彥閩縣人成化丙午鄉薦正德中知蘄州性耿介明毅忤宗藩不爲少屈流賊入寇集兵禦之城賴

以全

福建通志

林鈍字叔魯閩縣人永樂中領鄉薦會試乙榜授常山訓導常山科第久乏鈍嚴立教條常勤訓督終其任登賢書者凡八人遷寧國教諭亦多所造就嘗典湖廣江西省試其在湖廣時有士子餽之金求預薦書者鈍白於有司正其罪及卒長山興國二縣志皆紀其賢三子

清源曰泮曰濬淵俱登進士第遂以清源恩贈工部主事所著有說鈴餘響等集藏於家

明人
物考

泮字用養遊太學時有誣奏祭酒陳鑑者泮伏闕抗疏直之成化壬辰第進士授南京大理評事歷寺正讞獄矜恤多所平反遷知廣州藍糞諸山峒蠻叛服不常泮親帥兵攻之擒其渠魁又豐湖保劉庚作亂單車造壘諭降之擢廣西叅政江西左右布政入尹順天進戶部右侍郎總儲務權倖斂手正德三年拜南京戶部尚書逆瑾嫉之矯旨令致仕復羅織其江西罪罰米二百石

福州府志

卷四十九

人物列傳

完

輸邊泮既歸乃假官舍以居布衣蔬食談經不輟卒賜祭葬兄清源字用源天順庚辰進士官南京戶部主事弟濬淵字用淵與泮同舉進士歷官按察司僉事

萬歷
府志

王鼎字器之閩縣人成化辛丑進士授上饒令改樂陵選

御史擢大理寺丞奉命覈勲臣庄田歸報稱旨詔增其俸正德閒官右都御史尋乞休賜玉帶馳驛歸卒贈

部尚書賜祭葬鼎為樂陵時值歲饑賑救有方流民歸

者四百餘戶邑人立祠祀之後位九卿以精法律稱

鑰字公度嘉靖乙酉鄉薦授常山令卒於官鑰大臣

輸家財以佐公費政清而惠常山人懷之

萬歷府志

李廷儀字鳴鳳閩縣人宏治庚戌進士授定海令正大寬
平民父母之滿九歲通判順天外戚奪民田廷儀為直
其事以田歸民坐謫六安州同屬邑霍山饑巡撫牒廷
儀散賑全活甚眾擢貳南安南安巖郡也時劇賊阻山
谷屢出剽掠廷儀募能走險者帥以進討俘斬五百餘
降渠魁陳能白等數千人督府壞其功廷儀耻於自白
遂引疾歸為人愷悌率直善聲詩內行純至篤於天倫
少乳於嫂母事之嫂歿哀慟子源嘉興通判有詩名

萬歷

福州府志 卷四十九 人物列傳 五

府志

高文達字思德閩縣人宏治癸丑進士授戶部主事請告
家居起歷員外郎中乞休銓曹上其賢有旨擢浙江副
使致仕文達先世饒于財積而能散既歸荷笠灌園客
有造廬者以為僕也問高副使安在須臾束帶出見乃
卽灌園人正德戊寅與都御史林廷玉兩平閩卒之亂
嘉靖末詔立祠與廷玉同祀

萬歷府志

鄭伯和字節之閩縣人宏治辛酉鄉薦授無為州學正轉
國子博士秩滿當遷吏部郎薛蕙其門人也欲援之伯

求散地乃以爲壽府長史久之致仕歸伯和坦夷
長厚未第時以禮經授門下士甚衆及拜官爲教職不
樂他徙歸後猶誨誘後進不倦聞人之善若已有之見
人子弟力學有得辟舉者若已子弟得之也天性至孝
嫡母林幼撫有恩遇忌日必哀慕年逾耳順祭猶泣下
親黨貧者隨多寡周給力雖不足而意每有餘鄉人咸

敬服其德焉

萬歷府志

鄭善夫字繼之閩縣人宏治十八年進士連遭內外艱正
德六年始爲戶部主事權稅澣墅以清操聞時劉瑾雖

福州府志

卷四十九 人物列傳

五

誅嬖倖用事善夫憤之乃告歸築草堂金鰲峰下爲遲
清亭讀書其中曰俟天下之清也寡交遊日晏未炊欣
然自得起禮部主事進員外郎武宗將南巡偕同列切
諫杖於廷罰跪五日善夫更爲疏草置懷中屬其僕曰
死卽上之幸不死嘆曰時事若此尙可靦顏就列哉乞
歸未得明年力請乃得歸嘉靖改元薦起南京刑部郎
未上改吏部行抵建寧便道游武彝九曲風雪絕糧得
病卒年三十有九善夫敦行誼婚嫁七弟妹貲悉推予
之葬母黨二十二人所交盡名士與孫一元殷雲霄方

豪尤友善作詩力摹少陵閩中代擅詩文自林鴻高棟
後閱百餘年善夫振之明史

王公大字道行閩縣人宏治甲子鄉薦授泗州學正擢南
戶部郎尋擢貳浙鹺官終都勻守公大性廉介爲運同
時鹽課例有贏金千餘公大却不受後遷滇南以道遠
丐歸養家徒四壁觀風使者屢造廬禮之萬歷府志

陳達字德英閩縣人弱冠登宏治乙丑進士授寧波推官
訊鞫明允吏胥不敢爲奸以廉能擢南兵部主事尋入
主職方司事尙書王瓊推重之每當遷秩輒言吏部願

福州府志

卷四十九 人物列傳

五

留陳職方共事久之轉太僕少卿嘉靖初改大理寺晉
僉都御史巡撫山西議節祿糧爲宗藩誣奏罷歸家居
城市人罕見面環堵蕭然弟暹字德輝嘉靖乙未進士

歷官廣東布政使工詩規法唐人人傳誦之萬歷府志

朝錠字元之隆慶初以恩貢入成均領順天庚午鄉薦
歷象山知縣巖州知州投牒歸抵家猶轉永寧府同知
或勸之行竟不出朝錠爲都御史達子世其廉靜澹然
如水歷官二十載貧不異諸生時鄉居杜門讀書絕跡

城市死而子孫不能自存

萬歷府志

陳墀字德階閩縣人宏治乙丑進士授東莞令之官止一
僕廉以律已慈以愛民舊有引錢令皆私之墀悉卻不
取土寇黎巢哥肆猖獗墀奉檄尅日討平之南海衛官
穀儲倉典守軍李清等坐陳腐缺額力為請豁政聲籍
甚銓部以治行徵啓行日指揮蔣世奇舉其裝曰明府
行李蕭然若是乎曰吾素性如此家法如此墀世父煒
官方伯有重名海內故云後官終貴州按察司副使

萬歷

鄭餘慶字崇善閩縣人正德丁卯舉人知鎮海縣嘉靖二

福州府志

卷四十九 人物列傳

五

年日本入貢構隙倡亂一郡騷嚴為防禦賴以救寧
明年亢旱徒跣拜禱大雨隨渥葺學宮置學田及新興
間時蓄洩以溉田五年夏大疫捐俸市藥多所全活至
冬大稔陳荒政十事不待命下先發庾食其甚疋羸者
纂輯縣志躬為裁訂以勞卒於官餘慶少孤奉母至孝
六母以先業多分叔子餘慶請於母承志弗違舅氏以
其售予百金矣母色不怡即以券還舅士大夫義之共

曰孝恭

福建通志寧波府志合纂

正德辛未進士知德興縣甫下車

至邑無城伐木爲柵與賊角時憲使統兵者欲以金
或啗賊趙謂民困安可重斂遂身入賊巢諭以義被執
計脫誘致賊黨數十人戮之賊引去歲大饑遣邑耆民
蔣喜疏請於朝力陳疾苦得蠲三年賦又得賑金七千
八百餘兩民始獲甦爲立碑頌其德官終武昌通判

通志

袁宗耀字世明正德癸酉鄉薦以母病不上春官嘉靖初
授銅陵教諭年四十餘未有子妻爲置妾宗耀曰吾日
暮矣勿更累人卽遣還後妻舉一子喜曰吾多病不慕

福州府志

卷四十九

人物列傳

五十四

榮進而嗣續是憂今有子歸老決矣遷開封教授不赴
家居敦尙行誼父有庶子分產讓之

萬歷府志

林繼顯字德純閩縣人正德癸酉鄉薦嘉靖初任新寧知
縣尙教化省刑罰均徭役舉廢墜廉介之操八年如一

日百姓思之爲立碑以志愛

萬歷府志

袁達閩縣人正德癸酉舉人嘉靖初知安仁縣泣政嚴整
邑素多盜躬自捕獲一訊卽得其情自是邑無盜竊

湖廣

通志

鄭漳字世績閩縣人正德丁丑進士授戶部主事歷員外

鄭嘉靖初轉守肇慶坐事待察復起知登州秩滿擢兩淮鹽運使尋轉廣西叅政改河南時李默爲太宰薦歷臬藩入爲南京兆刑部侍郎默得罪言者誣漳以年老乞歸卒賜祭葬漳貌不逾中人而狷介不屈守肇慶時督學蕭鳴鳳氣凌諸郡守漳與爭論上章相攻朝議直漳寔言爲漳同年進士意殊厚邀漳竟不見嚴嵩父子持柄方岳餽遺多珍賄漳以左轄入覲獨持數青布爲贄卒之日器無珍玩侍無媵妾僅遺圖書若干卷

萬歷府志

陳則清字君揚閩縣人正德丁丑進士授泰州守改和州

福州府志 卷四十九 人物列傳 五

又調滁州擢南刑部員外郎坐誣謫判台州未幾擢守程畚累遷至都御史巡撫雲南卒于官賜祭葬賻滿廬守州郡俱有惠政在滁賑荒全活甚多開府雲南人尤

德之 萬歷府志

郭波閩縣人正德丁丑進士知長洲縣性敢摯無所避購告言民間事瑣屑必知豪宗以有手籍之入者未輒縱舍遷工部主事以抗織造中官罷去志聰誣奏下詔獄調按

察照磨 蘇州府志

藍金字德深閩縣人正德己卯舉人嘉靖間令湖口素性

清苦以課士勸農爲務嘗夜半微行見二婦人績久而
饑家中獨有酒一罌議存清者飲客以濁自飲至底無
濁置酒嘆曰是酒一清徹底有如藍君矣翌日召兩婦
厚賜之巡按御史至立清廉貪酷四表令屬吏自揣立
位次衆莫敢措步淦攝衣直趨廉字下御史曰藍令之
賢尙未止此當更進一步卽以嶺北一人薦之以陞去

民遮道攀轅作去思亭

江西通志

林士元字世仁閩縣人正德己卯鄉薦知香山縣士元寬
厚慈愛每聽訟恬聲與之細語盡得其情久之民益相

福州府志

卷四十九

人物列傳

五

親如家人父子然一訊卽吐其實學宮在蓬峰山下科
第久缺爲改建城中自是賢書相續有行部者索賄士
元奮衣起曰媿民脂以奉上吾死不爲也遂以母老乞
改教竟爲所尼遷審理致仕歸

廣東通志

高應經字繼道閩縣人正德己卯鄉薦初授祁門教諭性
行剛介作人先道德而後文詞語爽氣和恩意懇至士
習翕然不變歷巖州知州卒貧無以葬初之弟子齋金

往助其懷慕若此

萬曆府志

高應禎字貞甫閩縣人正德辛巳進士初知湘潭縣時安

休流賊越境嘯聚應禎多方緝治境內獲安與學士

創書院與生徒講學邑有祠廖道南爲之記

萬里府志

劉世揚字實甫閩縣人正德十二年進士改庶吉士除刑

科給事中世宗卽位議加興獻帝皇號世揚疏諫都察院牒司禮監攝中官吳善良帝手批原牒付刑科以善良付司禮世揚言祖宗制凡降詔旨必書於題奏疏揭或登聞鼓狀乃發六科宣於諸曹或國有大事上命先發諸曹必補牘於次日早朝進之無竟批文牘者今旨從中出褻天語更舊制不可帝不聽已列先朝直臣舒

福州府志

卷四十九 人物列傳

五

芬馬汝驥王思汪應珍張原等二十人請加恩以旌忠直諸臣各進秩一等嘗因災異世揚請倣古人几杖箴銘之義取聖賢格言書殿廡帝納之歷吏科左給事中與同官李仁劾詹事顧鼎臣汚佞且言今日詹事卽他日輔臣帝怒詰詹事進輔臣出何典例世揚等引罪帝怒不解予杖下詔獄旣乃得釋帝以久旱躬禱世揚言在獄囚及建言謫戍諸臣怨咨之氣上千天和請悉疏釋帝不能用張璫桂萼被劾罷帝責諫官不喜世揚乃盡劾璫萼黨尚書王瓊而下數十人章下吏部而尙書

方獻夫亦璫黨也但去編修金瑤御史邀鉞太僕
姚奎郎中劉汝輓員外郎張啟郭憲待詔葉幼學儲良
才八人而已未幾復偕同官趙漢等陳修省八事中言
大學士石瑤貞介歿未易名尙書李鏊國之盜臣身後
遺金得諡給事中鄭一鵬坐論楊一清再杖削職一清
敗一鵬宜復官世揚發璫黨見憾于璫一鵬又嘗忤
璫黨會璫已再相而瑤實前賜諡璫因激帝怒謂給事
言皆妄乃謫世揚江西布政司照磨停漢等俸然鏊諡
亦由此奪世揚屢遷河南提學僉事告歸卒

明史

福州府志

卷四十九 人物列傳

五

鵠翔字宇卿嘉靖癸卯鄉薦授蘄州學正歷遷常州府
同知冰蘖獨持自常俸外一無所染然簡直不能事上
官轉靖江王傳卒鵠翔爲都諫世揚子卒之日僅守先
人敝廬而已家居時值婦翁亡無嗣外姑捐千金產贈
之謝不受

萬歷府志

謝蕢字維盛閩縣人正德辛巳進士擢禮科給事中嘉靖
初疏諫乳媪劉氏及宮人孫氏濫封因勸世宗節恩澤
戢內侍又論救翰林呂柟悉見嘉納會冊中宮有闈寺
女姪入選蕢按其世籍劾罷之南京災疏請勉力行修

德政以答天心復陳科舉之弊乞崇經術以去邪說
宿弊以求實學嚴約束以節民財又請正體統戒聰察
寬三公詰責略九卿註誤復諫官體庶職戒近習禁報
復諸所建白皆關國體大禮議起蕡謂都給諫張紳曰
吾禮臣當以死爭力排張孚敬桂萼之議連章詣左順
門素服待罪奪俸三月一日有旨取議臣疏蕡當直以
朝議進再索復進三下而三進之世宗怒曰直科者誰
也左右以蕡對蕡附奏曰皇上燕閒清曠故敢以朝議
進冀垂觀覽若議臣之言久當聖心臣故不敢進也因

福州府志

卷四十九 人物列傳

五十九

疏乞歸田不允已而召百官至左順門勅諭去本生直
考興皇蕡與諸給舍遮百官伏闕泣諫詔杖闕下幾斃
尋轉右給事中福州海門潮汐舊迂迴東山下爲二十
六灣折入河口水部門海寇內窺者不得揚帆至內港
宏治間鎮守鄧太監惑番船厚利於上王地方鑿新港
徑趨大江舊河淤塞河口以東民日敝至是蕡上疏陳
新港六害乞塞之以甦地方弭海寇詔下鎮巡興工填
塞被命覈楚粵邊儲蕡自湖南上言天下藩臬以下用
刑太酷民命無措自權奸煽禍以來所在荼毒生民遭

霜之葉不可以風垂絕之病豈容再汗世宗可其奏詔
鉞版頒諭天下為當路者所忌出知直隸太平府未任

卒隆慶改元錄嘉靖言事諸臣贈太常寺少卿萬歷府志

葉奇字宏偉閩縣人正德辛巳進士除御史以議大禮廷

杖嘉靖四年巡鹽兩淮丁憂復除巡按應天又巡雲南

貴州致仕分省人物考

林武字克相閩縣人正德辛巳進士除浙江道御史巡撫

山東建言降夷陵州判官告病歸分省人物考

戴亢字師賢閩縣人正德辛巳進士授戶部主事值世宗

福州府志 卷四十九 人物列傳 李

入繼大統議大禮亢與同郡給事中謝普伏闕上疏世

宗王張孚敬言怒杖之幾斃後轉員外郎監楚稅真荆

門巨猾於辟逋稅畢輸出僉憲四川忤當事遂引疾歸

復起補貴州土官王呵响構亂亢勦之捷聞有白金文

綺之賜乞疾歸亢性狷介歷官有冰蘖聲家居杜門掃

軌卒年八十餘萬歷府志

袁成能字從道閩縣人嘉靖乙酉鄉薦授太平教諭歷莘

松滋三邑令轉廣州通判衡州同知觀風使者薦其賢

又轉河東運同鎮遠太守以為遼東太僕少卿未上卒

於途成能仕三十餘年未嘗治生產俸八與兄弟共之
凡兄弟子女婚嫁費皆已出縉紳高其行義其卒也旅
於常德府之傳舍囊無餘貲童僕方悲號有龍翔霄者
罷郡家居素重成器貨棺斂之及葬卜地又力不能售
鄉人聞爲袁太僕也割數畝以讓不取其直

萬歷府志

林密字茂直閩縣人嘉靖丙戌進士令淳安明敏寬和修

學宮葺書院置浮梁設社學廣義冢封壇儲倉陞太倉

州邑人樹碑建祠於屏山終臨安知府

淳安縣志

王應槐字汝旦閩縣人嘉靖戊子鄉薦授高唐州學正服

福州府志

卷四十九 人物列傳

全

闕再補太倉州應槐敦尚氣節以方正率士州守廷辱
士應槐叱守白其寃卽拂衣歸年三十餘以尙書教授

子弟家徒四壁窮約終身

萬歷府志

鄧遷字世喬閩縣人嘉靖戊子舉人知香山縣下車卽峻

繩里胥贄餽一邑肅然縣多寄莊另立順德新會等都

推才幹一人爲領袖賦役盡完修書院暇則與諸生講

學其中擢嘉興府通判著嘉善有築城功

廣東舊通志

王子聰字汝達閩縣人嘉靖甲午舉人知於潛縣清勤守

官不取一錢而民間利弊隱微畢見邑號爲玉壺冰破

天目山大盜鮑暹等斬獲二百餘人御史舒江薦治
行第一丁艱去再補景寧治如於潛兩邑共祀之

於潛景寧

志合纂

洪世文字國華閩縣人英魯孫暄子嘉靖戊戌進士由戶
部擢湖廣叅議浙江山東副使世文歷楚藩有平徭功
轉浙值倭亂戢暴掠居齊值歲荒廣賑濟民皆德之尋
以母老乞終養承歡者十年餘弟世武歿爲撫其孤世
武嘉靖丙午鄉薦第一官終評事書得蘭亭筆法有詩

名

萬歷府志

福州府志

卷四十九人物列傳

全

王繼芳字師啓閩縣人嘉靖庚子鄉薦知仁化縣操行廉
介首以興學愛民爲務事持大體動必以正捐俸建濂
溪書院日集諸生講業民畏而懷之建碑以紀其績官
終永定知州

仁化縣志

林庭學字利節閩縣人嘉靖乙未進士授中書舍人擢兵
科給事中風采凝峻彈劾無所避世宗命往勘遼事歸
稱旨遷戶科都給事疏奏嚴嵩諸姦利不法狀世宗震
怒逮繫詔獄廷訊杖六十謫湖廣幕稍遷雷州守未任

卒

丙辰通志

林堪字尚乾閩縣人嘉靖癸卯鄉薦初授澄邁教諭分授南畿過姑熟有兩上舍持數千金懷刺求通堪嘗繼尾曰借貲而負所學受貲而負吾君皆天戮民也兩上舍愧而遁轉宣化令同安洪朝選叅粵藩與堪善御史龔愷劾朝選波及堪遂罷生平外溫內肅一語不妄發性至孝大母許治家嚴堪侍竟日未嘗移寸趾奉父母承顏順志有一弟父母愛之弟子一而堪子三體親意以

已業均焉

福建通志

周文燦字伯熙閩縣人嘉靖癸卯鄉薦知三水縣守廉潔

福州府志

卷四十九 人物列傳

三

而政寬平諸不便于民者毅然去之營建遞舉民不告

勞上官高其能薦知六合縣

廣東通志

黃季瑞字宗和嘉靖丁未進士出知南海時白度廢圯季

瑞始至慨然振刷定立品式便民征輸又清滯獄擒積惡驅久役表貞節立義冢大修堂廨吏舍之傾欹者以肅防維皆捐俸爲之民不告勞未幾以治行最內召仕

至大理少卿

分省人物考

王希周字文治閩縣人嘉靖己酉鄉薦初授瑞安教諭素

持身端謹士之貧者常捐貲卹之士以是愛

懷焉擢和平知縣僅二月東埧居民張德傑有鄰邑人寄宿去通判黃佳以爲盜縱牙爪捕之急德傑受迫而斃因言東埧居民盡窩盜欲屠之促縣同舉希周不聽夜勒開門發兵希周曰事急矣無如之何遂拔劍自刎

佳乃止

參瑞安縣志
惠州府志

林森字起新閩縣人嘉靖己酉鄉薦知嵎縣奉母孝嘗曰吾無慰母惟當爲好官耳舊有糧長常例金森草之每恤困窮抑豪右定圖均役吏胥束手調象山行李蕭然里老醵金爲贖卒不受其治象山有定海富民以寬下

福州府志

卷四十九 人物列傳

畜

獄讞者多避嫌不決其子叩登聞理父冤事下命森鞫之森白其冤前後被薦剡者二旌獎者八陞知均州

紹興

寧波二府
志合纂

陳柯字君則閩縣人嘉靖庚戌進士由戶部郎轉杭州知府時浙督胡宗憲方計欵王直以閒徐海陳東等使其內潰柯與宗憲畫策徐陳果相屠王直亦伏誅宗憲上其功受白金文綺之賜擢虔州兵備殲大帽山賊林朝

曦等屢建戰功

福建
通志

李遇春字以仁閩縣人嘉靖壬子鄉薦由戶部郎出知柳

州府調尋甸和易慈祥以興革為已任築河堤濬渠道
置義田寢征調嚴閉納石岡等礦場分屬四十三寨夷
落以忤撫臣再調不赴尋人至今思之居家以孝友著

宗族鄉黨無閒言

纂雲南
通志

李應陽字希旦閩縣人嘉靖壬子鄉薦授碭山諭尋轉曲
陽令性醇樸不善逢迎司理過邑中以供帳薄譖御史
劾之未期年罷歸解組日橐無一文敝衣羸馬走京師
教授弟子六年藉其館穀還里中賃屋以居布袍粗糲
至不能舉火同籍共周恤之巡撫許孚遠表其廬

萬歷
府志

福州府志

卷四十九

人物列傳

李

鄭雲鑿字邦用閩縣人嘉靖丙辰進士授戶部主事出為

浙江提學副使請託斷絕擢湖廣叅政楚世子幼武岡
王構飛語將為不利雲鑿按治之世子得襲時當王試
事張居正以子為請辭以疾不往會河決淮邳當事者
承居正風旨議濬河五百里以通運雲鑿躬詢利害上
河議數千言事遂寢居正奪情假歸諸司出迎奔走數
十里道出於汴雲鑿郊迎外無加禮言官希意攻其

訕廣西念母老乞休杜門侍養以薦起四川左布政
卒日豈有九十親年而徇祿萬里者乎辭不赴

字啓成

今舉人由某

令有富民胡某犯法皆以賄縱鯉化置之法擢
主事主爵者胡某戚也為修前愆謫判粵西適思因
渠魁韋大才為亂鯉化察龍英會長趙彥麟可用召

方略果擒大才亂遂定以艱歸

福建通志

林舜道字允中閩縣人嘉靖己未進士歷刑部郎中出知
南安府清操甚勵南安當江廣之衝車騎絡繹供帳多
所裁省郡舍蕭然惟一篋貯敝衣數襲一僕備役使而

福州府志

卷四十九 人物列傳

李

已秩滿陞四川副使尋轉貴州廣西叅政舜道自筮仕
不以片刺通銓曹故遷轉皆在荒服卒于官僚屬賻如

就殮貧不能葬閩督學王世懋為買地營窆

福建通志

鄭日休字德卿閩縣人嘉靖甲子舉人萬歷初任海寧教
諭重行實士以非公溷有司者召而訶之或遭枉抑必

力為白訓導沒日休為之殮且賻其子遣歸他若復祀

典飭祭器葺學宮賑貧士掩枯骼海寧士鐫諸碑擢惠

州推官持法平允部士葉春及為怨家所中論死日休

白其冤攝博羅縣篆清稅獎蘇民力民尤德之以丈量

勞瘁卒於官日休孝友嫺睦嘗為族人贖嫁其女計偕
時友人林世和卒京邸為歸其喪以女女其子學有根
底為古文詞峭健有力著有大學錄司理文集子元
諸生能詩工古文後入成均著有詩文集二十卷宛洛
游草一卷元勳字無功性至孝年十三失怙哀毀逾成
人母病肺抱持二十年疾亟顙天請代執兄喪如父撫
諸孤如子恒曰經史吾田也忠孝吾寶也學者稱為孝

弟真儒

浙江通志參
陳勳撰墓志

瑄字漢奉元勳子崇禎辛未進士由戶部郎知嘉興府

福州府志

卷四十九 人物列傳

李七

政務簡靜興革利弊振起文教浚城河築官塘以便往
來遷副使歷江南巡撫大理寺卿唐王據福州晉工部
尚書鼎葺後卒著有昨非菴日筭叅二集六十卷撫吳疏

草四卷

崇祀鄉賢錄
參浙江通志

陳子文字在中閩縣人嘉靖己丑進士授麻城令精敏沉
毅訟者一見輒記其姓名里居雖老吏猾胥不能舞弊
歷戶部郎出守長沙巨盜尹大憲阻山環水為寨歷數
郡守莫能除子文故緩之盜畜積甚多竊出貿易乃伏
壯士數十人於水次遣一人微服買犢往誘之伏兵卒

發擣其渠魁餘黨竄稱全楚治行第一丁內艱服除
補池州單車入境下挈妻孥諸生雋異願請業者子文
與講明經義遷湖廣副使勦撫諸苗悉降附以勞卒初
子文父鏗雅有知人鑒教諭貴溪識相國夏言於諸生
中及子文貴言以通家子欲致門下子文固遜謝言怒
遂不復省錄士論以此尚之

分省人物考
參萬歷府志

林偕春字孚元閩縣人嘉靖己丑進士選庶吉士授檢討
以草張居正誥詞無所誇飾居正憾之用年例改湖廣
副使遂請罷報可居正敗起浙江提學副使裁鑒精審
福州府志

卷四十九 人物列傳

李

請寄無所受會稽陶望齡客游燕及補試偕春奇其文
檄以冠其軍予廩餼誦言兩浙士有先望齡舉者吾不
相文後名第相符人服其神識性骯髒不能事權貴屢
起屢廢仕終湖廣參政

李中字時卿閩縣人以貢任臨江府教授學邃行端口不
言利立規條士風不奮舊學宮濱于江申議改建春秋
祀品煩苦里甲力誥釐葺士與民交懷之陞保昌知縣

臨江
府志

何文倬字東海閩縣人嘉靖閒任石屏知州單車赴任豈

第宜民操守廉潔

雲南通志

陳樂子九成閩縣人隆慶丁卯舉人爲南靖學教諭歷兩
雍學錄轉大理司務居官執法無所徇或勸求善轉樂
笑曰婺也老而倚門乎平生衣無采食無肉臥無帷帳
所居蕭然環堵人謂陳君良苦曰吾猶日飽太倉五斗
何苦也卒于官幾無以斂其恬退澹泊有古人風

福建舊通志

黃功懋閩縣人以戶部郎中任嚴州初至郡卽語寮屬曰
茲郡幸無犢髀焉用斤斧况大荒之後生理殊艱道宜

福州府志

卷四十九

人物列傳

堯

寬恤惟盜賊竊發獨嚴比問之法萑苻潛消四郊無
時遇洪水入城乃設糜分給及赤旱經旬百計虔禱甘

澍立沛又發倉賑饑建躍龍亭民藉寧謐

萬歷嚴州府志

蘇夢暘閩縣人歲丙午司南都官獄日戢獄卒不使凌辱
諸囚又恐其夜虐之則監置一鑼今日有虐囚者卽使
鳴此不鳴者與同罪由是獄中蕭然郎中沈琬嘗指獄
戶語曰此故生地獄也蘇司獄去吾不敢繫人矣舊時
囚有寤而莫爲收葬者卒置竇中羣犬恣食之夢暘惻
然適料囚米有餘卽白視獄諸曹郎預爲構以待死者

諸曹是之相率白中丞丁賓賓時視秋官篆聞之
發衣帑諸物令夢賜給施諸囚未幾轉粵東守禦吏日
賓特獎夢賜而資遺之甚厚夢賜年三十餘未有子以
司獄奉薄不攜家其為吏目亦然

分省人
物考

鄭士奎字五聚閩縣人萬歷己卯舉人歸化教諭緇塵不

染轉湘潭知縣三月掛冠歸

舊福建
通志

林材字謹任閩縣人萬歷十一年進士知舒城縣擢工科
給事中吏部推鄭洛戎政尙書起張九一貴州巡撫材
極言兩人不當用九一遂罷王錫爵赴召材疏論并及

福州府志

卷四十九

人物列傳

七

趙志臯張位再請建儲豫教又爭三王並封之謬屢遷
吏科都給事中劾罷南京尙書郝杰徐元泰經畧宋應
昌惑沈惟敬言力請封貢材乞斬應昌惟敬不報志臯
位擬旨失當材抗疏駁之二十二年夏六月西華門災
材偕同官上言切指時政缺失帝愠甚以方修省不罪
吏部推顧讓謹總理河道材論止之兵部將大叙平壤
功材力詆石星罔上星乃不敢濫叙其冬復率同官言
成憲不當為祭酒馮夢禎不當為詹事劉元震不當為
吏部侍郎帝積前憾言材屢借言事誣謗大臣今復暗

傷善類乃貶三官餘停俸一歲會御史崔景榮等論救再貶程鄉典史材遂歸里不出光宗卽位始起尙寶永再遷太僕少卿還朝未幾卽乞歸天啓中起南京通政使卒崇禎初贈右都御史

明史

董應舉字崇相閩縣人萬曆二十六年進士除廣州教授與稅監李鳳爭學傍墮地鳳舍人馳騎文廟前繫其馬用是有名遷南京國子博士再遷南京吏部主事召爲文選主事歷考功郎中予告歸起南京大理丞四十六年閏四月日中黑子相鬪五月朔有黑青掩日無光時

福州府志

卷四十九

人物列傳

三

丙子年補刻

遼東撫順已失應舉言宜勤政修講以消禍變因條上方畧帝置不省天啓改元再遷太常少卿提督四夷館一二年春廣寧告警京師恟懼朝士有託故移家者應舉請斬之以勵廷臣且陳急務數事極言天下兵耗民離疆宇日蹙由主威不立國法不行所致帝以爲應舉知兵令專任較射演武已上言保衛神京在設險營屯遂擢應舉太僕卿兼河南道御史經理天津至山海屯務應舉以責太重陳十難十利帝悉勅所司從之乃分處遼人萬三千餘戶於順天永平河間保定詔書褒美遂

用公帑六千買民田十二萬餘畝合閒田凡十八萬畝
廣募耕者畀工廩田器牛種濬渠築防教之藝稻農舍
倉廩場圃舟車畢具費二萬六千而所收禾麥穀五萬
五千餘石廷臣多論其功就進右副都御史天津葛沽
故有水陸兵二千應舉奏令屯田以所入充歲餉屯利
益興五年六月朝議以屯務旣成當廣鼓鑄乃改應舉
工部右侍郎專領錢務開局荊州尋議給兩淮鹽課爲
鑄本命兼戶部侍郎并理鹽政應舉自揚州疏請釐正
鹽規議商人補行積引增輸銀視正引之半爲部議所

福州府志

卷四十九 人物列傳

三

丙子年補刻

格應舉方奏析而巡鹽御史陸世科惡其侵官劾之魏
忠賢傳旨詰讓御史徐楊先遂希旨再劾落職閑住崇
禎初復官應舉好學善文其居官慷慨任事在鄉里好
興利捍患比沒海濱人祠祀之

明史

陳國是字定遠閩縣人萬厯庚子舉人任教授轉國子博
士爲監丞時大司成欲越次援監生國是力爭之乃止
出爲蘇州同知會魏璫擅國遂掛冠歸編內監緝略一
書列宦者事由春秋漢唐迄明以垂鑒戒時各郡省爲
魏忠賢立祠鄉之縉紳集議不決國是獨以從容二字

諷止之故各郡省有祠而閩獨無蓋得國是力云舊福建通志

林文熊字青海閩縣人萬曆甲辰進士授蘇州推官察諸生倪某冤脫其巨辟置大猾翁啓陽於法進南京兵部職方郎有總兵喬承恩者與文熊不相得乘警喚衆加餉欲釀變以傾文熊文熊目承恩挽其手將赴闕承恩惴惴始不敢動後敷歷楚粵郡守秩滿擢兵備南韶適逆璫遣中使四出而韶爲入廣咽喉遂拂衣歸老舊福建通志

福州府志 卷四十九 人物列傳 三 丙子年補刻

鄧秉修字愧前閩縣人萬曆癸丑進士授行人出封外藩饋遺無所及歷監察御史上備兵六事忤權貴直聲大

振巡按河南未行卒福建通志

鄭懋洵字克睿閩縣人萬曆癸酉鄉薦知南和縣一塵不

染性簡亢與僚屬相齟齬誣以侵賑奪官時蔣以忠守

廣平憐之爲輸贖乃授徒于臨清年餘藉其束脯始得

歸舊福建通志

董養河字叔會閩縣人以貢授工部司務適漳浦黃道周下獄中書文震亨疏救繫錦衣衛養河與楊廷麟馬思

理等以道周黨並下獄養河不少芥蒂與道周及濮州
葉廷秀唱和號曰西曹秋思道周獄解養河還原職陞
戶部主事遷員外郎卒著有羅漢閣解書及奏草詩評
雜文兄養泓有文名任宿州司馬子謙吉崇禎辛未進
士歷任戶部員外郎

福建通志

林先春字元圃閩縣人天啓乙丑進士令嘉善狷介自持
無一毫苟取任三年撫按交薦廉能擢科員丁艱歸先
是嘉善民顧朝衡以不孝聞先春捕治之朝衡脫身至
京師投權璫又因籍沒魏大中多忤權璫意遂嗾其黨
福州府志

卷四十九

人物列傳

古

丙子年補刻

考功吏以死註冊服闋赴補知爲所陷或勸之自白先
春不辯而歸居家聚徒講學布衣蔬食杜門不出年八
十餘終著有易象叅洪範孝經解孟略等書

福建通志

國朝

○李鍾廣字開先閩縣人順治庚子舉人值海氛饑饉日
渡江踰嶺八十里外負米奉親初任將樂教諭耿逆變
亂鍾廣棄官遁深山中

王師定閩擢知武城縣興利除弊旱不爲災蝗不入境民
有予金君生愧蒲鞭我知辱之頌例販私鹽者斬有司

捕獲十人以上者遷秩鍾廣捕十八人吏屬皆賀鍾
曰吾未廉其實奈何以十八人之命博一官乎詎得私
取僅四人餘悉出之時稱明允

福建通志

○陳子達字仲兼閩縣人順治壬辰進士由庶吉士檢討
數歷楚蜀秦所至皆有實績擢陝西按察司愈清慎自
砥以裁缺歸雖久宦不置田廬僑寓柘浦蕭然若儒素

云舊福建通志

○鄭羽侯字爾畏閩縣人順治壬辰進士令項城南至適
治河使者築金隄催樹柳梢亟羽侯念民困為力請得

福州府志

卷四十九 人物列傳

七五

減無美民德之祀名宦

舊福建通志

○方開鐸字聲木順治壬辰進士和易謹愿歷官鳳陽道
不苟取于民以外艱歸卒于家

舊福建通志

○李文麟字天閣閩縣人康熙甲子舉人授霑化令地濱
潁州俗獷悍多盜文麟頒示教條沿村勸諭立保伍督
緝之法遠近嘯聚盜魁剪除殆盡終任盜賊相戒不入
境山東饑截漕賑濟文麟于四郊分設粥廠躬行散給
全活無筭攝海豐篆決滯獄數十修霑化 文廟譙樓
以治行擢戶部主事監督蕪平倉轉員外郎遷兵部職

方郎中卒于官

福建通志

○陳子威字其畏閩縣諸生康熙十七年海上寇擾卒威與叔君翼獻策軍門曰寇所恃者沿海之人爲之耳目故鴟張豕突猝不易制若聯絡海上漁艘斷其聲援賊不難盡矣撫軍吳興祚善其言給聯絡僉事道劄使募三千人所在勦捕歷著戰功興祚上其事授廣南韶道歷涼莊郎襄叅政君翼閩縣貢生授聯絡通判劄擒僞都督章元勳又追殺僞將王亮歷戰有功卒于軍子瀛襲授金華府通判

福州府志

卷四十九 人物列傳

美

○鄭善述字孚世閩縣人康熙庚午舉人除知固安邑旗民錯處強者或凌暴細弱民苦之善述一切繩以法強不敢逞地濱永定河河工搶修椿葦輒取給于邑善述調度有方人以不病以失出鑄級歸家居閉戶却掃文酒自娛著有敬修堂集子方城字則望籍建安少受業于嚴父隨任固安習知政體以貢受泰寧訓導丁外艱雍正癸卯舉于鄉時季弟方坤先登第知邯鄲縣景州知州方城皆在署佐理益負經濟才暇則兄弟拈韻賦詩今所傳唱和集是也癸丑成進士知新繁縣時下令

舉田奸民乘機平古墓塞堰溝以爲新墾方城力陳其
弊得無恙又遭大水突入城門方城荷鍾帥民負土填
門城中賴不沒凡事率先以行信孚于民治行稱最乃
以蜀闡磨勘事鐫級上官皆爲扼腕延王錦江書院人
喜得師遂卒于蜀著燥吻集綠痕書屋詩集

○朱謨字宏陳閩縣人康熙丁丑進士知德平縣討平劇
盜境內以安性寬平近人民樂親之歷刑部主事員外
有聲轉禮部郎中病篤乞假

特命御醫調理尋卒于官

福州府志

卷四十九 人物列傳

七

○林兆惠字子方閩縣人康熙己卯舉人知貴縣平易近
人人懷其德擢泗州同知州邇苗黎土番雜處兆惠以
至誠臨之不假威嚴人覲特擢廣南韶道正己率屬爲
制府所器重有忌之者以奉文採買楠木不如式去官
兆惠胸無城府與人交有終始尤篤于故舊周恤貧乏
而窮約自甘有古君子之風焉

○施霖字能繼閩縣人康熙庚辰進士授平原知縣尋改
西寧持正不合上官意或勸其稍委隨霖曰吾唯知理
是非與事當否不爲威怵也擢工部主事以疾告歸霖

少聰慧過人爲諸生才名震一時家貧授徒以給兄奉遺孤幼穉季弟治生不自給霖皆力任之族兄無嗣爲之置妾有甥爲諸生撫而成之人尤稱焉

○謝道承字又紹閩縣人幼孤力學康熙庚子舉鄉試第
一次年成進士以母老不蘄仕卽謀歸省親故慰勸方
赴廷對選庶吉士授編修乞假歸晨昏侍養築一枝
山房率子弟讀書其中家居十三年母卒喪畢

召見授中允晉侍讀轉國子祭酒卽移居監院中與生徒
昕夕講習崇正學斥浮囂躬率先以敦厲之太學風氣

福州府志

卷四十九

人物列傳

末

爲一變明年遷內閣學士兼禮部侍郎仍領祭酒事未
幾以勞卒于官道承齟齬開敏不羣長從舅氏候官林
佶游所學日進爲詩歌古文詞軼出輩流性介特不驚
聲譽時漳浦蔡世遠長洲徐葆光以文學有盛名先後
造謁皆不報再官翰林驟被峻擢前大學士趙國麟實
薦之道承未嘗執門下士禮國麟以是益重焉在朝歷
職日淺未盡其蘊時論惜焉著有二梅亭集子璫乾隆
戊辰進士官戶部額外主事卒文學有父風

○周紹龍字允乾閩縣人少穎敏以文學名雍正癸卯進

士下內親丁未以薦選庶吉士時四川有清丈之
龍承命以行蜀經獻賊之亂四野荒蕪糧課缺
設自首法親覆丈之課有加而民不病以績最授
修尋改監察御史巡察山西前官與巡撫不和叅奏各
屬遂罷職紹龍和衷協理上下安之任滿巡撫據情請
留一年遷右通政積勞以疾聞

上命巡撫爲醫治尋愈途中丁生母艱

上慰留紹龍以終制請懸缺以待皆異數也服闋晉陞天
府丞卒于官紹龍風度清整蕭灑出塵遇事籌理七方

福州府志

卷四十九

人物列傳

堯

方向用而遽卒善書人得其尺幅皆藏弄之子正思庚
戌進士由庶吉士編修典試河南有聲

○陳霖字德侯閩縣人幼失恃事父孝謹于兄弟友愛尤
篤雍正庚戌進士宗伯蔡世遠嘉其所學且重其行奏
薦之授吏部額外主事三年出知直隸故城時久旱不
雨下車理冤獄出其囚而雨任赤城請豁浮糧再調大
名以勞卒官

○林其茂字文竹閩縣人少穎悟博覽強記乾隆丙戌

知山陰邑清海素被水患其茂量洼突相曲折

以禦外潮城河淤塞自西郭門至偏門徧行深
修城山書院建義學治城垣寬濶澤國治行稱最以失
察鑄級歸卒年三十其茂風力峻整有幹局在職七年
民便安之著有鷖音集山陰集

福州府志

卷四十九 人物列傳

全



福州府志卷之四十九 終